

東
華
續
錄

東華續錄

臣周濟蕃恭校

乾隆三十九年甲午春正月己未諭軍機大臣等據阿桂等奏定於正月初十日各路同時並發所辦甚好佇聽捷音又據稱官兵撤赴底木達俱令裹帶乾糧不許舉火自應如此辦理至所稱僧格宗章谷一路應於總兵英泰參將汪騰龍內派留一員駐紮卽著派英泰在彼實力妥辦○庚申阿桂色布騰巴勒珠爾奏臣等前議由谷噶凱立葉及馬奈博堵等處爲併力合攻之計其馬奈博堵二處見由明亮等悉心躡探籌辦至谷噶第一道山梁礮卡本少第二道山梁礮卡嚴密若從此繞越搶據格魯瓦覺三寨斷其來援之路則第二道山梁之賊可不攻自潰過此至勒烏圍皆

係據高臨下甚爲得勢其凱立葉一路見調豐昇額進兵若占據薩爾赤鄂羅山梁順山而下則康巴達格什戎岡亦被官兵截斷在外而穆爾津岡之賊卽不能與勒烏圍相通且官兵一至谷噶山梁與凱立葉相望從內轉攻穆爾津岡賊必難於抵禦而黨壩存駐之兵亦可前來會合又據綽斯甲右應襲土司雍中旺爾結等稟稱大兵必滅金川伊等除已派出三千六百名外願添派番兵別尋徑路誓必奪取山梁臣隨諭以進剿有期汝等可卽添派多兵督率助剿諭軍機大臣等阿桂等奏籌畫進剿情形頗見誠心所籌甚善是阿桂豐昇額一路之兵甚爲得勢如果能進逼勒烏圍則賊人外險已失必多惶窘自難久於支拒便可掃蕩賊巢擒縛兇豎以成大功指日卽屆進兵吉期佇望捷音速至又據稱綽斯甲布土司等情願多派番兵搶奪山梁其情頗爲真切卽諭

以督率多兵奮攻助勦等語所辦甚合機宜又據奏擊獲小金川番人和爾嘉供詞其說亦未可盡信但所供情形與前此訊問番人等供詞均屬相仿看來金川賊眾此時尙視僧格桑爲奇貨直待情勢窘迫再行獻出以圖解免或將七圖安堵爾等一併同獻其情大率類此但兩金川罪大惡極萬無可追並非縛獻逆酋所能完局況今各路進兵尤不宜復通文檄設或賊人情急差人詣軍門獻俘求降均宜置之不理一面將所獻賊酋賊目拘留仍卽設法擒其所差頭人一併檻解京城磔處示眾一面督兵上緊進勦各路將軍均當深體朕意切實辦理惟早盼喜音之至○辛酉諭朕臨御以來以敬 天報本爲要不敢稍有疏略凡遇 郊壇大祀必親詣行禮自降輿以至禮成一切典禮俱有加增四十年來罔敢少懈及至三十七年朕逾六旬始命大學士禮部將降輿

遠近稍爲酌減此所以節繹儀而省精力欲盡禮於大祀也然以因朕逾六旬始然而誠敬益得申致我萬世子孫謹懍朕意若年未六旬切不可稍減典制儻蒙上天眷佑臨御年過六旬方可如朕見行儀制舉行著永遠爲令○乙丑明亮富德奏查當噶爾拉山勢縣延不能直前牽綴但於阿布爾則德烏塘二處設爲疑兵臣仍同赴馬奈力同進取茲據探路番人回稱繞至思覺地方四面瞭望約有七八十戶實爲克舟九寨屏障必須攻克但思覺在博堵之上路徑雖有三條雪深冰滑倍難行走土兵等情願先取博堵以便搶奪思覺臣查河北馬奈一路應於布拉克底之臨卡地方密爲進發其河南博堵一路亦應由墨壘溝越過甲木山梁更爲出其不意但河南北各路俱有數日程途官兵移動究不如土兵趨捷是以先將屯土兵丁照所擬道路令其分頭先進

一面將滿漢兵丁酌派續進臣仍臨時迅往督率見准阿桂札知於正月初十日會同進攻已將地方遠近扣定卽遵 欽定日期進發所有安臺設站事宜飭臬司李世傑密爲布置均可無誤惟正地一帶緊要留兵二千人僅敷守禦而南路軍營又斷難抽兵添往恐賊出滋擾於格藏橋甚有關繫見密札副將鄭國卿在革布什咱番戶內再行添募務卽攢湊漢土官兵百餘名帶往甲魯與正地山口交界處大張聲勢作爲進攻之狀得旨所籌皆合機宜速望捷音之至○庚午以伍岱爲四川軍營參贊大臣○壬申阿桂色布騰巴勒珠爾奏臣等於初二日至布朗郭宗查點滿漢各兵應帶火藥鉛彈軍械及支給十日裹糧均已齊全當卽分撥第一隊五千餘名令海蘭察額森特普爾普保甯帶領於初六日進發第二隊五千餘名臣色布騰巴勒珠爾率同福康安烏什哈

達特成額成德帶領於初七日進發第三隊五千餘名臣阿桂率同積福福珠禮倭昇額海祿帶領於初八日進發其布朗郭宗喀爾薩爾應駐防兵見令長青派員帶領照指定地方兵數安設又自喀爾薩爾至谷噶丫口縣延百餘里中間梭洛柏古等處臣於經過時隨地撥兵分駐並於總兵富紳六十六二人內派出一人統領防駐又奏此次分路密進谷噶等處未便遽設臺站是以並未通知富勒渾第令將應需若干站人夫上緊籌備俟官兵將次見敵始令總理大員邁行安設至此次滿漢兵均係步行越險攀高除各關十日口糧勢難多帶見酌以麪一斤抵一日口糧作成餅餌攜帶既便且可無庸舉火並於一隊中又分三隊通融攜帶使前進銳兵益爲輕利接踵之兵亦可邁行接濟明亮富德奏臣等於正月初五日均抵格藏橋卽於橋北地方藏兵密施號令此

次屯土兵共三千八百餘名照所擬道路先行分派其河北駱駝溝一路派兵六千名富德統領河南博堵一路派兵四千名奎林三保統領俱緊隨土兵進攻內將滿兵及滇黔兩省營兵挑選出邕奮勇者二千二百名督率土兵前進以六百名交和隆武科瑪帶領截取卡卡角以五百名交圖欽保拉布東阿帶領截取馬奈其對河木底格魯克古兩處各用二百名德赫布噶塔布等豫備皮船隨土兵前往夾攻尙餘滿漢精兵七百名以珠爾格德劉輝祖帶領爲奎林三保後援惟此路進攻先議從墨壘溝翻山而下近於初二日大雪封山不辨路徑因卽撤赴格藏橋作三夜行走於初七日夜潛渡河南深嘉布繞出酌分二路先搶斯第博堵爲併奪思覺之計臣明亮統兵一千六百名在河北馬奈進攻迎面賊卡至何處需兵接濟何處併力向前仍俟臨時酌辦諭軍機大

臣等阿桂等奏在布朗郭宗派兵分隊進剿情形又據明亮等奏在格藏橋分路撥兵進攻事宜所辦俱極妥協而阿桂另摺所奏各件均屬實心籌畫又阿桂奏據王進泰等報稱博羅克守卡將弁將投出番人斯塔克達爾等解送大營是賊番於小路潛出並非難事恐其借名投降暗藏奸計自當早爲防守若於隘口見有形迹可疑者卽當立時剿殺既可多殲賊眾且使賊人知所畏懼不敢妄圖軼出王進泰長青等均當一體妥辦○乙亥豐昇額奏初八日帶兵抵薩爾赤鄂羅山卽將南面雪山占據並於孟拜拉山梁等處分兵駐守初九日阿桂所遣納木扎伊達里常保住帶兵二千到營見派分攻要隘諭軍機大臣等豐昇額奏占據薩爾赤鄂羅山頂並納木扎帶兵二千前來足供會剿覽奏欣慰豐昇額所占山梁及經由路徑並納木扎等由阿桂軍營至凱立葉之

路皆係金川通連要隘賊人忽不設防官軍如入無人之境且既占據山梁從此進攻凱立葉由上而下其勢甚易自當迅期得手是此次所覓進兵捷徑阿桂一路既甚妥協其明亮一路馬奈馬爾邦路頗平坦亦可易於攻克較之上年攻勦功噶爾拉當噶爾拉之路應不啻事半功倍惟盼剋期奏績數日內卽得捷音○丙子諭河南巡撫何煒於地方諸事俱能實心經理其幫辦河工亦甚妥協著加恩授以總督銜仍管河南巡撫事以示嘉獎姚立德自署河東河道總督以來承辦河工諸務頗能認真著卽實授○命刑部定聚眾結盟罪○丁丑阿桂色布騰巴勒珠爾奏第一隊官兵於初九日進谷噶山梁山口下埋伏初十日奪喇穆喇穆之左右山梁及附近贊巴拉克各山並將色依谷山占據見進攻最高之登古山計攻入賊境一百餘里明亮奏臣從河北正面進攻

拉綽石卡五座及迤東山嶺大戰碉一座均於初十日攻克據富德報稱由駱駝溝攻取戰碉二座木城一座大小碉百餘座復約會和隆武將截取卡卡角之兵翻山直取馬奈見在併力合攻其德赫布所領官兵據報攻克格魯克古賊寨四十餘處卡卡角對河之木底亦經陳世庚率領土兵攻得要隘二處臣派兵一千前往接應至奎林所攻之斯第博堵官兵均由布拉克底一帶用皮船載渡見已超上山梁搶得木城二座諭此次阿桂明亮等分路進剿同時並發於一二日內乘賊不備迅克要隘山梁搶占木城碉寨賊眾望風奔潰殲戮甚多阿桂等悉心調度動協機宜而領兵各員協力進攻均能所向克捷著先賞荷包以示鼓勵仍令該將軍等查明在事出力之將領弁員同將軍參贊一併交部議敘至兩路漢兵屯土兵丁不避冰雪攀越山險奪卡攻碉無不爭先

踊躍實屬可嘉著阿桂明亮查照伊等應得分例加賞一月錢糧以示體恤○戊寅明亮富德奏臣等合圍馬奈於十一日將四面礮卡攻克馬奈東北環抱三峰地名絨布寨形勢亦屬扼要仍分上下兩路夾攻於十二日占取寨落四十餘處至奎林渡河攻取木城二座見占山梁已踞克舟九寨之巔仍設法先壓斯第博堵諭軍機大臣等據明亮等奏全行攻克馬奈並奪取絨布寨其距馬爾邦諒應不遠而奎林所占山梁直踞克舟九寨之巔若能由上壓下攻之當易爲力見在將弁兵丁俱各奮勇前進甚屬可嘉惟益勉速成大功用膺茂賞同日又據豐昇額奏官兵至凱立葉山根卽有賊人知覺抵禦不能久駐其已得之達爾扎克山梁路徑極險不通凱立葉見在築卡防守等語看來凱立葉一路礮踞山巔克之非易原議必由此路並攻者因其與谷噶相近藉以牽

綴賊勢今阿桂見於谷噶攻進若再能深入進至勒烏圍則凱立
葉之礪可不攻自潰豐昇額切毋急於進取或致稍有挫誤况官
兵於進剿之處若遇連勝則勇氣百倍設見有損傷之事卽不免
心動氣沮豐昇額等自可嚴緊攻圍斷不可不察利害妄令輕進
○辛巳諭在籍加刑部尙書銜錢陳羣老成端謹學問淵醇自康
熙年間通籍詞垣以後久直內廷洊歷卿貳奉職恪勤嗣因養病
予告優游林下者二十餘年爲東南搢紳領袖前此屢次南巡疊
加授尙書銜晉階太子太傅在籍食俸並時以御製詩章寄令廣
和儒臣老輩中能以詩文結思遇備商榷者沈德潛故後惟錢陳
羣一人而已前歲來京見其精神强健爲之喜慰因賞給人淺俸
資頤養冀其壽躋大耋尙可再赴闕廷益承優寵昨冬聞其忽爾
抱疾廬念良殷曾於奏內溫諭垂詢意其卽可調理就痊以副

恩眷驟聞遠逝深爲悼惜著加恩晉贈太傅入祀賢良祠並於浙江藩庫內賞銀一千兩經理喪事所有應得卹典仍著該部察例具奏尋予祭葬諡文端○阿桂色布騰巴勒珠爾奏十二日攻登古山對面山梁連克四卡餘賊竄入第五高峰卡內其喇穆喇穆碉內踰溝接應之賊被索倫兵衝斷殲戮甚多至第五峰碉卡雖未攻克尙可繞越圍截報聞○壬午諭弘暢係誠恪親王嫡長子著襲封誠郡王其次子弘晆乃誠恪親王素所鍾愛著加恩封爲貝子伊兄弟務當共相友愛孝奉伊母福晉善承恩眷以副朕篤念懿親至意○癸未舒常奏綽斯甲布頭人松乃溫布等覓得附近俄坡之石拉溝水池之格爾格兩處賊人防範稍疏於十五日派常保李天貴分路督攻殺賊數十人臣將大小頭人賞給綹段銀牌又據溫布等稱前蒙賞給土兵口糧係半支半折上年收成

歉薄懇支全米應並據情請旨諭軍機大臣等舒常奏綽斯甲布頭人松乃溫布等領兵勦殺殲戮甚多所辦甚好松乃溫布前因其誠心出力賞戴藍翎並各賞銀五十兩此次更屬奮勉著卽賞戴花翎升授五品頂帶以示鼓勵至土兵半支半折定例已久今搏節糧運尙恐不敷若再加增本色米石更恐難以接續著舒常面諭土兵等以定例如此各路一體遵行若爾等此路米數獨加恐各路土兵聞而忌嫉轉於爾等無益莫若照舊支領爲妥爾等如果立有功績不但可得重賞亦覺顏面有光不更愈於些微升合之加添乎如此曉諭土兵等自必更加踴躍感奮各路土兵或有似此者各該將軍均宜一律辦理

二月甲申朔豐昇額奏達爾扎克山南溝內止可駐兵牽綴查山後尙有進兵山口可以繞出賊後臣與伍岱於正月十五日帶兵

前進前隊甫至山根林內伏賊突出殲斃十餘人又有賊番接應
抵拒兼之路險雪滑因令暫撤再行設法辦理諭軍機大臣等凱
立葉一路進攻較難自不宜在彼株守莫如併於阿桂處合力並
勦較有實濟且阿桂攻克丫口以來頗爲得勢正須有續進之兵
以壯聲援豐昇額酌留兵少許派員駐守以綴賊勢卽統見有之
兵速赴谷噶丫口助阿桂進攻勒烏圍則兵力益多軍聲益振矣
○乙酉加河東河道總督姚立德總督銜河南巡撫何煇兵部尙
書銜○丁亥明亮富德奏卡卡角前山形如丁字凡官兵竭力上
攻之處卽賊人加意防守之處查木谿山梁之半東向峭壁攀援
俱絕其上雖有滾石放槍之賊而山峰一帶並無卡隘因將扎勒
桑所帶當噶爾拉牽綴兵一千名撤回令各隊兵於十九日分路
攻打密挑健兵三百名派扎勒桑帶同空藍翎興善保守備田藍

王先於十八日往山梁峭壁下豫伏是夜與善保田藍玉二員潛領吉林兵七名索倫兵二名屯兵八名於萬難容足之路攀附而行比及黎明臣等見興善保田藍玉等已在峭壁之上餘兵亦接踵而至賊番正當四面迎拒突見我兵從此截出驚惶失措礮內各番望風潰散官兵奮勇齊登追殺五十餘名又截住礮內賊番殺死十三人當將兩山梁全行占據至奎林與德赫布三保分取博堵斯第賊番抵禦甚力均暫撤回仍於山梁屯紮另行辦理諭興善保田藍玉履險先登甚屬可嘉著加恩興善保賞給達克巴圖魯田藍玉賞給諾丹巴圖魯仍照例各賞銀一百以示優獎○己丑 上御經筵○辛卯豐昇額奏阿桂遣嚮導番人策旺來營據稱達爾扎克對面之莫爾敏山旁地名迫噶拉穆扎官兵據此即可繞取凱立葉但近來賊礮更密臣已派兵前往攻取莫爾敏

山以便奪占迪噶拉穆扎諭軍機大臣等前因阿桂已由谷噶了口統兵深入恐其後路未能嚴防適豐昇額奏凱立葉一路驟難攻進因令移兵往谷噶一帶爲阿桂後路聲援今豐昇額又覓有可進之路自當相機妥辦若果將莫爾敏山攻克繞取凱立葉其於阿桂進攻格魯瓦覺之兵亦甚有益且前據阿桂奏二十三日天氣已晴官兵進剿自易爲力佇盼捷音○癸巳諭據明亮等奏派兵由卡卡角三路進攻當阻險相持之際有空藍翎興善保守備由藍玉攀越登山賊人埋身峰下排槍施放而各槍俱不過火其正面山背賊人所安之礮亦皆隨火炸裂官兵勇氣百倍乘勝勦殺將卡卡角全行占據此皆仰賴上蒼嘉佑俾賊眾魄褫膽落至官兵等無不努力奮勉而興善保田藍玉二人勇往出眾尤屬可嘉興善保著加恩授爲四等侍衛田藍玉著加恩授爲都司

遇缺卽補其餘出力之將弁兵丁並著明亮等查明記檔俟攻得馬爾邦後卽奏聞交部分別從優議敘富德自到軍營以來實心調度著加恩授爲都統遇缺補用又建昌鎮總兵英泰出師南路已歷四載頗能實心奮勉著將英泰所有革職之案准其開復○甲午大學士等議奏經筵禮成後向於協和門筵宴一次嗣因跟役擠搶食品議准停止本月舉行經筵復奉旨以崇文大典筵宴不應停撤請將宴桌改設文華殿東西配殿內俟禮成後應行與宴人員按班祇領從之○乙未諭據舒常奏綽斯甲布土司覓得周宴對面山梁並日旁下面碉卡有可進之路派兵冒險前進奪碉殺賊等語看來此路難於直進然藉此以挫賊鋒而綴賊勢亦不可少其土兵內陣亡受傷之人均堪憐憫自應照例賞卹至各土兵之勇往出力由於該土婦及土司土舍等誠心恭順甚屬可

嘉著舒常傳旨賞給綽斯甲布老土婦倉旺拉穆土司雍中旺爾
結土舍綽爾甲木燦段各四匹以示鼓勵又奏稱永平呈報千總
袁國璜見賊一二百名往來行走似修碉卡隨即帶兵前往槍斃
數賊等語賊人修卡自防固屬情理所有但我兵正在分路進攻
賊方守拒不給安得復有如許餘閒賊眾專修碉卡似係賊人故
作整暇飾爲無恐之狀或伺我不備潛出滋擾亦未可定舒常不
可不留心防範勿稍疏懈○戊戌諭豐昇額等奏稱占得莫爾敏
山攻克迪噶拉穆扎等語此次打仗賊人捨命前來竟將我兵截
斷乃官兵奮勉出力將賊擊敗甚屬可嘉所有索倫雲騎尉委署
參領定吉爾圖健銳營前鋒校官敏西安委署驍騎校秦紹榮受
傷身故俱著交部照例議卹其餘陣亡受傷之滿漢屯土官兵俱
著豐昇額等查明分別造冊送部一併議敘○辛丑諭受傷身故

人員給予世襲者襲次完時不准襲恩騎尉著爲令○丙午賜四川軍營陣亡總兵王萬邦入祀昭忠祠○丁未 上啓鑾謁 東陵並巡幸盤山○庚戌 上謁 昭西陵 孝陵 孝東陵 景陵至 孝賢皇后陵奠酒○臨故大學士公傅恆塋賜奠○明亮富德奏臣等攻克穆谷後查庚額特山前後賊眾愈多據險死守奎林一路雖經士兵乘夜搶占喀咱普相連山骹連修木城三座而自深嘉布盤旋而上山頂分左右兩路斯第博堵寨落均在山岡環抱中間遇有下壓之處賊卽添礮防護自應另覓閒道但此一帶山梁居高壓下實可絕賊人由深嘉布潛出滋擾之事復據土兵自願修蓋礮房俟官兵一有移動卽可據礮拒守見已飭令趕築又大礮業已鑄成見擬於庚額特對河施放仍令土兵四出哨探覓路進攻報聞○辛亥 上駐蹕盤山○壬子諭軍機大臣

等阿桂等奏攻打羅博瓦山官兵奮勇殺賊其中射斃者尤多可見滿洲索倫之得力賊番每在碉內藏匿若能引出碉外使得益展我弓箭之利則更善耳此次進攻羅博瓦山官兵有從凍石中跳越而過者並有經賊人林內放槍而官兵毫無旁顧其勞績茂著者甚眾實爲出力可嘉著阿桂查明登記檔案俟攻得要隘時一併奏聞交部議敘其有出力超眾者卽奏明以示鼓勵其陣亡之千總張魁及受傷之侍衛庫爾德等並著查明咨部辦理至於官兵之奮勇立功由於帶兵之將領董率得宜而實由於將軍之規畫有方均堪嘉尚著賞阿桂荷包四枚火鏢一件色布騰巴勒珠爾荷包三枚火鏢一件福康安海蘭察普爾普額森特等四人各荷包二枚火鏢一件烏什哈達保甯特成額海祿成德六十六等六人各荷包一枚火鏢一件卽隨報發往以示鼓勵至阿桂此

次非但措置悉合機宜且胸有成算志在必滅金川所籌悉與朕見昭合阿桂如此誠心出力實不負元戎重寄朕適駐蹕盤山卽以行程所佩鏤文刮鯨囊解賜以寓一體聯合之恩眷

三月丁巳 上回鑾○己未 上還京師○庚申阿桂色布騰巴

勒珠爾奏羅博瓦山賊碉堅守此山最關緊要二十三日派兵乘夜進發海蘭察等繞至第二第三峰丫口下分兵直上山梁占據碉卡一面往搶第三第四峰各碉俱已攻克賊窺第一峰碉內額森特等會合併攻於二十四日攻開此次攻克大碉八座大小二十六卡殺賊二百餘人並大頭目阿讓星格申則二名查羅博瓦距遜克爾宗不遠原可乘勝衝壓但喇穆喇穆係賊酋緊要門戶尙與勒烏圍相通且於後路糧運有礙見擬撥兵由羅博瓦對面山梁截斷併力掃除諭羅博瓦爲賊酋緊要近捷門戶屢經阿桂

等相機進剿今復將其山峰全行占住殲賊甚多皆由阿桂調度有方將領等奮勇直前海蘭察普爾普額森特尤爲出眾故能所向克捷實屬可嘉阿桂著晉階太子太保海蘭察著授爲內大臣額森特著授爲散秩大臣以示獎勵至其餘出力將弁及滿漢土屯官兵俱著查明登記冊檔俟攻克烏圍後一併優敘○癸亥

上親耕藉田○甲子

上幸南苑行圍○命添設觀耕臺幄次

○丙寅禁民間私製藤牌○己巳以尹嘉銓爲大理寺卿調王賈望爲甘肅布政使以郝碩爲浙江布政使徐恕爲浙江按察使○召塘琦來京以王顯緒爲安徽按察使○辛未諭軍機大臣等阿桂等奏焚勦得斯東寨情形一摺所辦甚好佇盼捷音又奏番人科爾甲等供稱官兵此次攻勦金川賊番俱極害怕等語官兵連次得勝聲勢倍加壯盛乘其間風膽怯之時相機深入自可卽望

成功至頭人內丹巴沃咱爾尤爲可惡若能及早殲除則金川失一得力之人我兵奮攻自更易爲力阿桂等務努力爲之發去鏤玉題崖轍一枚朕親製詩命工鐫成寄賞阿桂爲指顧銘勳吉語將此由六百里加緊傳諭知之○壬申明亮富德奏穆當噶爾碉卡見已摧殘惟喀咱普一碉賊番死守尙難乘船徑渡奎林所占山梁取水爲難近於斯第上班得古覓有暗泉一道派扎勒桑帶兵千五百名由庚額特山後丫口進攻書景額等帶五百名由穆當噶爾繞出土兵所築五碉之前進偪舒亮等帶五百名在正面一帶揚聲牽綴臣富德同奎林等帶兵六千先占水泉急取斯第臣明亮帶兵一千赴喀咱普一路進壓爲斯第一路官兵聲勢報聞○乙亥諭豐昇額奏阿桂稱谷噶一路可乘之隙甚多令帶兵前往併力辦理等語凱立葉一路旣難邁進原不應過於株守今

留伍岱在凱立葉牽綴賊勢而豐昇額前赴阿桂軍營合力進攻兵勢更盛於事更爲有益若果進至勒烏圍則凱立葉之賊自可不攻而潰至於兩路相距不遠往來本屬甚便但所經路徑賊人皆可瞭望而知如前次海蘭察等行走所帶之人無多或尙不甚覺此次撥兵至四五千名卽難掩賊番之耳目萬一窺見我兵移動潛來邀截皆不可不極力嚴防著傳諭伍岱於撥兵前往時務須妥爲照料勿使賊人得以伺我兵之隙方爲妥善○丙子阿桂色布騰巴勒珠爾奏官兵攻克羅博瓦後相機直擣距勒烏圍日近忽於初七日乘雪霧迷漫有賊八九百人分四股潛來偷劫一股從羅博瓦山陽兩股從山陰潛上合搶山峰中間常祿保營盤當經常祿保放槍擊打並將跳入卡內之賊砍斃烏什哈達額森特福康安等聞聲帶兵接應賊俱敗逃其侵擾登古山梁一股亦

潛至湖廣官兵石卡經普爾普帶滿漢各兵分兩路衝殺烏什哈達等復帶兵由山坡斜下截斷賊人歸路槍箭齊發傷斃無數初八日夜又有賊百餘潛來索柱楊崑營盤亦經官兵擊退查此次係莎羅奔弟兄三人及大頭人等攢湊番僧及各寨凡可打仗賊人親自率領前來經官兵痛加殲戮自必心膽俱寒勢將潰敗諭此次賊眾潛來偷劫營盤經官兵奮勇合擊痛加勦戮甚屬可嘉常祿保功績尤爲出眾著賞給錫諾爾恩巴圖魯名號仍照例賞銀一百兩並著以總兵升用遇有缺出卽行補授○庚辰諭軍機大臣等明亮等奏稱攻取喀咱普等處奎林和隆武奮戰受傷阿爾都珠爾格德超眾出力等語阿爾都於至險地方衝冒樹林越溝登山奮戰奪取賊卡殺敗賊人以通奎林帶兵之路珠爾格德見賊來砍奎林隨卽射斃兩賊並將其餘擊敗此次若非阿爾都

珠爾格德則奎林之兵及奎林甚屬可危其功非尋常奮勇打仗者可比著從優加恩俱授爲頭等侍衛阿爾都賞給咱爾沁巴圖魯名號珠爾格德賞給扎克布巴圖魯名號照例各賞銀一百兩仍賞給小荷包各二箇以示朕加愛之意奎林和隆武帶領官兵鏖戰殺賊受傷河因感激朕恩黽勉出力深堪嘉尚奎林和隆武各賞玉韞一枚小荷包三箇明亮富德此次亦甚勤勞明亮著賞玉韞一枚小荷包四箇富德著賞玉韞一枚小荷包三箇又諭明亮等奏進攻斯第打仗情形一摺將領官兵俱於至危至險之時仍能鼓勇殺賊甚屬可嘉俱應查明存記檔案俟應行議敘時一併咨部從優錄敘其將軍明亮參贊富德董率勤勞奎林和隆武力戰受傷更爲繫念已賞給玉韞並有旨同阿爾都珠爾格德分別賞給荷包以示慰勞矣前明亮等以覓有水泉奏於十一日會

兵進勦朕卽疑脫出番人經本情節支離其言未必足信恐係賊番詭計縱出引誘我兵墮其術中深以爲慮連日盼明亮一路軍報逾期不至屢以此向軍機大臣諭及今閱所奏攻戰情形果不出朕之所料幸而我八旗勁旅各以敵愾爲心帶兵之滿洲將佐皆實心體國志在勵勇滅賊故能不避艱阻出險而亨至前次指引路徑之番兵實爲可恨不可不向其切實根究雖係巴旺番人未便遽加刑訊亦當密喚至營嚴加盤詰使之不能遁飾如果訊得該番人金川指使實情卽傳巴旺頭人至前將該番正法示眾庶足儆戒將來至明亮等此次進攻雖亦奮勇殺賊然將弁兵丁受傷者至百餘人究不免於少挫明亮此時且宜整兵少待而斯第一路尤不宜冒昧再往見在阿桂一路軍聲甚振且有可進之機豐昇額又前往會勦自可望其乘勝深入如阿桂等能攻至勒

烏圍賊必併力於西路拒守其南路防範必然疏懈明亮等當留心探聽即可相機進剿以期得手至阿桂前奏謂撥滇黔兵五千已諭催該督撫等卽速料理起程其明亮所攻馬爾邦一路若竟難於攻剿或正地有可進之徑卽帶兵攻彼襲取似亦出奇抵隙之一法至此路若可進攻約需兵若干應否卽用新調滇黔之兵酌量檄知帶兵之員遵照辦理或正地雖有路徑進取無益則又不必勉強遷就並著阿桂悉心熟籌總期於事有益○辛巳諭侍郎奉寬爲人謹慎在阿哥書房行走甚屬勤勉昨因腮頰癰腫請假特派御醫診視以冀速痊今聞溘逝殊堪憫惻所有應得卹典著該部察例具奏尋予祭葬

夏四月甲申諭大學士舒赫德于敏中著各賞古今圖書集成一部俾其收藏傳付子孫守而弗失再故大學士劉統勳原欲一體

賞給不意其猝爾身故未及身與因念伊子劉塘尙克世其業亦著加恩賞給一部○諭軍機大臣等伍岱將凱立葉一路所餘兵丁分駐防守並兩次擊敗賊眾甚屬可嘉凱立葉一路雖暫不能深入然嚴守地方實爲緊要如稍不留意以致失利於賊於全軍聲勢關係匪輕將此傳諭伍岱嚴飭各處官兵晝夜嚴守如遇賊人攻劫務須互相救援痛加殲戮卽賊畏懼不來亦不可經時坐守蓋我軍分路前進賊眾豈有不知必將凱立葉賊番撥於將軍阿桂等軍前救應伍岱不時派兵攻取自可以分奪其勢止不可傷損我軍耳至阿桂處消息尤當時刻探聽如彼處得利伍岱亦可相機直入並將此諭阿桂知之○辛卯舒常奏雍中旺爾結等率土兵於三月二十三日攻達爾圖頭二三四各碉臣督兵合攻因大雪撤退又雍中旺爾結稟稱金川番人察爾結及綽斯甲布

番民山扎爾結自金川逃出求賞給收領並懇免死卽照所請交
伊收管諭以投順原可免死如能擒獻頭人更當重加賞賚並令
喊諭番眾知之諭軍機大臣等綽斯甲布土司雍中旺爾結誠心
出力甚屬可嘉著賞銀百兩以示獎勵仍將朕御用大荷包一對
小荷包四箇隨報寄發令舒常賜彼用昭優異俾其益知感奮至
此次土目土兵傷亡稍多殊覺可憫並著照例加倍賞給至舒常
見賊守禦甚緊恐土兵徒傷無益體恤曉諭至再土司始聽撤回
深合駕馭外番之道伊等見參贊大臣如此矜憐愛護益足勵其
勇往之忱舒常所辦甚合機宜又奏降番二人俱貸其一死自行
投出與打仗擒獲者不同罪尙可原若有能擒獻賊酋賊目者並
卽奏聞重賞使金川賊眾見而動心若果聞風接踵來降亦足渙
散賊勢於軍務不無小補各路將軍不妨照此辦理○甲辰諭軍

機大臣等明亮等奏擬由正地進攻所籌亦是通計各路情形惟阿桂一路可望易於得手業已諭令阿桂如得遜克爾宗或徑抵勒烏圍卽應將新派之滇黔兵五千全行調往應用設尙未能卽進又不值徒爲株守之計自應酌撥二三千邁往南路令明亮率領徑赴正地攻其無備明亮等仍應遵照前旨密咨阿桂妥商而行但明亮移兵另攻正地之時應令富德留駐河北一帶仍照前攻打使賊人不能窺見端倪豫作準備方爲妥善又據富勒渾奏大板昭薩拉梭洛柏古等處俱派官兵防守是富勒渾於軍營後路防範頗爲盡心今官軍日漸攻進更宜倍加嚴密實力周防斷不可稍涉大意又桂林奏科多至僧格宗相距雖僅三十餘里其間深箐僻途賊匪易於出沒莫若將僧格宗所需糧石改由南路章谷運交其餘附近僧格宗等處者卽就近在僧格宗及歸併美

諾等處支領使米石不由僻處經行可杜賊人窺伺等語所見甚與朕前諭相合自應如此辦理至所奏出默資溝運送兵米行至將近日古嚙溝被夾壩搶去米九十餘斤等語見據桂林奏此後糧運不再經行默資溝等處自可以無後患但此次夾壩搶去米石較多尤不可不上緊嚴緝昨已賞給汪騰龍參將銜仍令在僧格宗辦事並派桂林往來照管且此時見有敎成在彼正當及早搜擒賊匪毋任漏網○丁未諭武英殿見辦四庫全書之活字板著名爲武英殿聚珍板○庚戌以高樸爲兵部右侍郎

由左副都御史遷

○辛亥以旱命刑部清理庶獄減軍流以下罪直隸如之

五月癸丑朔諭向來秋朝審人犯如通計數及萬人卽敕部將三次緩決者分別減等以示法外之仁今自乾隆三十六年以來距今歲秋讞時約計人犯又有萬餘其三次以上緩決者至期原在

應行查辦之列但爲時尙有數月此際仍須滯繫囹圄見因京師及近畿地方甘霖未霑農田待澤方殷已降旨將刑部及直隸省軍流以下罪名減等發落至此等緩決人犯不但三次者今秋應予減免卽緩決一二次者其情罪本輕再隔數年亦仍歸於寬減若令早爲查辦使刑獄一清自更足以昭欽恤而召和甘著刑部堂官卽將曾經緩決一二次以上人犯逐一查明酌量所犯案情以次辦理奏聞分別減等副朕矜慎祥刑之至意該部卽遵諭行○乙卯命選宗室王公子入宗學肄業著爲令○庚申命直隸平糶○乙丑定分部學習主事三年期滿奏請留補本部及改用知縣監丞助教例○丙寅諭國家當文治修明之會所有古今載籍宜及時蒐羅大備以充策府而裨藝林因降旨命各督撫加意採訪彙上於朝旋據各省陸續奏送而江浙兩省藏書家呈獻者種

數尤多。廷臣中亦有紛紛奏進者。因命詞臣分別校勘。應刊應錄。以廣流傳。其進書百種以上者。並命擇其中精醇之本。進呈乙覽。朕幾餘親爲評詠。題識簡端。復命將進到各書。於篇首用翰林院印。並加鈐記。載明年月姓名於面。葉俟將來辦竣。後仍給還各本。家自行收藏。其已經題詠諸本。並令書館先行錄副。卽將原書發還。俾收藏之人益增榮幸。今閱進到各家書目。其最多者如浙江之鮑士恭、范懋柱、汪啓淑、兩淮之馬裕四家。爲數至五六七百種。皆其累世弄藏。子孫克守其業。甚可嘉尚。因思內府所有古今圖書集成。爲書城鉅觀。人間罕覩。此等世守陳編之家。宜俾尊藏勿失。以永留貽。鮑士恭、范懋柱、汪啓淑、馬裕四家著賞。古今圖書集成各一部。以爲好古之勸。又進書一百種以上之江蘇周原培、蔣曾瑩、浙江吳玉墀、孫仰曾、汪汝璥及朝紳中黃登賢、紀昀、勵守謙

汪如藻等亦俱藏書舊家並著每人賞給內府初印之佩文韻府各一部俾亦珍爲世寶以示嘉獎以上應賞之書其外省各家著該督撫鹽政派員赴武英殿領回分給其在京各員卽令其親赴武英殿祇領仍將此通諭知之○諭前因彰寶患病未愈屢諭加意調攝並派御醫診視據彰寶奏稱病勢日深懇請解任回京調理會諭以見在無事不妨姑緩今據李湖奏稱督臣見今病體日甚心思智慮愈見疲憊等語看來彰寶一時不能向愈若仍令方疾治事轉恐不能安心靜攝彰寶著准其解任調理並著伊自行酌量或留雲南省城調養或緩程回京醫治以冀就痊其雲貴總督員缺緊要若由內地簡員前往未免道遠需時著卽令貴州巡撫圖思德就近前往永昌署理接辦彰寶任內一切事務其貴州巡撫印務著韋謙恆暫行護理貴州布政司事務著國棟署理其

按察使事務著圖思德於道員內揀選一員奏明遞行接署○丁卯以近畿地方缺雨命何煇於河南購麥撥運京城備賑○戊辰上奉 皇太后啓鑾秋獵木蘭○免經過地方本年額賦十分

之三○阿桂豐昇額色布騰巴勒珠爾奏查日爾巴當噶卽係日爾巴礪該處在凱立葉一道山梁之中若能占住卽可斷截賊番上下往來臣前此酌擬派兵從凱立葉山骹斜上約會凱立葉官兵前後夾攻者卽係此處嗣又遣人詳細躡看並與海蘭察等酌議以其地在山陰箐林深密崖礪陡險兼之彼此隔遠雪霧時作萬一不能如約夾攻卽不免有失利之處且官兵已定繞截喇穆喇穆後路一經占據山梁則喇穆喇穆之賊旣可不攻自潰而格魯瓦覺各寨皆歸掌握從此攻進勒烏圍不惟得勢而且捷近所有日爾巴礪似可無庸籌辦報聞○癸酉吏部議准直隸總督周

元理奏塔子溝通判八溝同知二處幅員遼闊案牘繁多必須添
官經理請將薊運河通判改爲三座塔通判分理土默特兩旗喀
爾喀庫倫兩旗奈曼一旗事務原設巡檢卽歸管轄其薊運河事
務歸務關同知兼管又順德府通判政務亦簡請改爲烏蘭哈達
通判分理翁牛特兩旗巴林兩旗事務原設巡檢卽歸管轄其順
德府通判事務歸順德府同知兼理從之○甲戌 上奉 皇太
后駐蹕避暑山莊○諭綠營旗員漢員遇陣亡議卹其子孫未及
歲者俱給馬糧一分著爲令○乙亥以定例見係王公之子孫娶
妻不給恩賞銀兩諭嗣後恆親王怡親王之縣字輩孫准給其和
親王果親王之縣字輩孫俱不准給至奕字輩孫等再給著爲令
六月丁亥諭吏部奏原任廣東龍川縣知縣汪承霽捐復原官一
摺甚屬非是汪承霽係汪由敦之子汪由敦爲國家得力大臣朕

每追念惋惜伊子如果成材深欲爲之培植卽尙無大故亦仍予格外姑容今汪承霽因衙役徐海詐贓斃命將白役張五一刑求誣服所犯非但私罪且以酷被劾其情尤重朕之惡酷吏甚於惡貪官貪官永不敘用豈酷吏轉可復令登進乎且汪承霽今春在盤山接駕業已查閱原案使其尙可棄瑕錄用朕彼時卽已加恩何待彼自行捐復其案情具在酷虐顯然在內在外俱難令其復行供職豈能以汪由敦之故廢公義而曲徇恩施乎至汪承霽原擬杖流論理本不應捐贖彼時尙因念及伊父汪由敦又以其母年老特予矜憐允從其請朕辦理已未免失之姑息此時卽再欲加恩亦止可令其捐一職銜俾得頂帶榮身足矣豈可復令重列仕途貽害地方又何以懲酷暴而肅吏治乎吏部堂官前此爲衍聖公孔昭煥奏請開復一案辦理卽屬錯誤自因孔昭煥爲大學

士于敏中兒女姻親爲之瞻徇第以孔昭煥業已加恩故未將吏部堂官議處僅予傳旨申飭該堂官理應稍知儆畏何得復有此奏汪由敦係舒赫德業師今爲汪承霽具奏顯欲周旋世誼其餘眾堂官又從而隨同瞻顧耳吏部堂官著交都察院嚴加議處至見在捐復人員並著吏兵二部查覈如有私罪情重之案卽奏明扣除不准捐復勿任冒濫○庚寅諭據阿桂奏五月二十二日賊人三四百名乘夜圍住遊擊福敏泰等營卡隨經放槍趕殺追至把總楊遇春所守木卡見賊人蟻集吶喊遂高聲傳號楊遇春在卡內應聲答號施放連環槍直下攻撲賊皆紛紛逃潰楊遇春卡內止有官兵五十餘人而賊眾二三百自二更至五更已將木卡砍開楊遇春並不稍爲動搖竟合力擊退等語福敏泰楊遇春奮勉出力甚屬可嘉見據阿桂另摺奏稱軍營出有各缺福敏泰著

卽升補甘肅蘭州城守營參將楊遇春卽著升補湖南永綏協守
備以示獎勵其原請升之效力副將溫有哲遊擊多永義千總張
維華三員著阿桂等遇有軍營缺出再行奏補其餘俱照阿桂所
請湖南長安營遊擊員缺著拜靈阿補授所遺湖北鄖陽協中軍
都司員缺著王國定補授又甘肅西甯鎮標前營都司員缺著陳
登龍補授所遺四川松潘鎮左營守備員缺著劉天德補授該部
知道○癸巳山西道御史戈源奏近據禮部奏請自乾隆四年以
後僧道未給度牒者交地方官遍查補給以備僧綱道紀等官之
選查乾隆元年至四年僧道之無度牒者已有三十四萬餘人自
四年迄今其私自簪剃者恐不下數百萬眾若紛紛查補必多滋
擾請嗣後永停通頒如遇選充僧道等官查其實在戒行嚴明者
具結咨部給照充補得旨所奏是僧道度牒本屬無關緊要而查

辦適以滋擾所有禮部奏請給發牒照之處著永遠停止其選充僧道官令地方官查明具結辦理亦如該御史所請行該部知道○甲午諭昨據御史戈源奏請停查給僧道度牒一摺已降旨允行矣禮部前請將乾隆四年以後未給度牒僧道交地方官通查補給一事止以備僧綱道紀等官之選第度牒不過相沿舊例散給仍屬具文而稽查實虞煩擾自以不辦爲妥若云防僧道滋事而設未必有牒照者悉能恪守清規而犯法者皆係私自簪剃方今法紀森嚴有犯必懲更無庸爲此鰥鰥過慮至遇僧綱道紀需人所在地方官原可查明僧道中之實在焚修戒法嚴明者具結呈報上司咨部給照充補何必因此一二人之補缺而令各省寺觀通查滋擾耶所有禮部奏充補僧道官必須給有牒照之例亦著停止○庚子諭軍機大臣等明亮見在帶兵赴正地進攻昨據

奏六月初一日已抵吉地此一帶後路多與金川賊境相通賊皆得潛出擾截前此投出番人供詞又有賊懼官兵由正地進攻之語賊人狡惡異常安知非詭計揚言誘明亮深入賊乃從旁抄出以斷我兵歸路於事甚有關係設或稍有疏虞不特此路行兵阻礙並恐全局因而牽動軍心不免生餒深爲未便是以朕於此路時刻繫念實因此路非阿桂軍營之谷噶一帶及明亮原營之馬尼一帶可比況此路不過乘閒出奇之用與阿桂直攻勒烏圍者不同今阿桂處兵力較盛見在覓路進攻又係從上壓下自可望其得手朕亦惟於阿桂一處佇盼捷音其明亮一路本非正兵原不冀其必能集事而防範則不可不周富德等務於明亮進兵後路不時遣人探聽俾得消息常通密爲籌備○調范時紀署禮部侍郎梁國治爲戶部侍郎○丁未諭軍機大臣等浙江甯波府范

懋柱家所進之書最多因加恩賞給古今圖書集成一部以示嘉獎聞其家藏書處曰天一閣純用甄贇不畏火燭自前明相傳至今並無損壞其法甚精著傳諭寅著親往該處看其房間製造之法若何是否專用甄石不用木植並其書架款式若何詳細詢察燙成準樣開明丈尺呈覽寅著未至其家之前可豫邀范懋柱與之相見告以奉旨因聞其家藏書房屋書架造作甚佳留傳經久今辦四庫全書卷帙浩繁欲倣其藏書之法以垂久遠故令我親自看明具樣呈覽爾可同我前往指說如此明白宣諭使其曉然勿稍驚疑方爲妥協將此傳諭知之仍著卽行覆奏尋奏天一閣在范氏宅東坐北向南左右甄贇爲垣前後簷上下俱設窗門其梁柱俱用松杉等木共六間西偏一間安設樓梯東偏一間以近牆壁恐受溼氣並不貯書惟居中三間排列大櫥十口內六櫥前

後有門兩面貯書取其透風後列中櫺二口小櫺二口又西一閒排列中櫺十二口櫺下各置英石一塊以收潮溼閣前鑿池其東北隅又爲曲池傳聞鑿池之始土中隱有字形如天一二字因悟天一生水之義卽以名閣開用六閒取地六成之之義是以高下深廣及書櫺數目尺寸俱合六數特繪圖具奏得旨覽○阿桂疊昇額色布騰巴勒珠爾奏查羅博瓦賊人據守之地名色溯普中閒及左右礮下共設六礮派兵三路於十二日月黑後分隊潛伏並令普爾普等攻喇穆喇穆各礮總兵成德等於喇穆喇穆之右牽綴賊勢普爾普等率兵直上連搶兩大卡賊人抗拒海蘭察等直抵礮根將第一礮圍住撬挖礮牆拋放火彈賊匪逃竄乘勝圍第二三礮將三礮全克其額森特及烏什哈達等所攻左右三礮亦皆攻取並將附近平寨奪獲再色溯普之前山勢又分兩支均

有堅礮二座是日又將向西一礮搶獲賊退入第二礮死守十三日將向南第一礮克獲其餘二礮地勢較峭擬擊木寨數座運礮轟摧得此二礮即可直抵遜克爾宗計此次獲戰礮十一座平礮四十餘閒殲斃大頭人達實策旺及巴古布里寨頭人二名諭阿桂等奏攻克色溥普賊木石礮並殲斃帶兵大頭人等一摺覽奏深爲欣悅此次將軍等督率有方各將領弁兵於山崖險仄之地均能勇銳直前頃刻之間克獲堅礮數十殲戮賊眾多人甚屬可嘉所有將軍參贊及摺內帶兵各員卽著交部議敘其在事出力之將弁兵丁查明咨部議敘用獎勞績○己酉撥河南麥十二萬石貯直隸平糶○庚戌諭軍機大臣等明亮奏正地一路實無可進之機擬由周安從噶克卓克采一路移赴凱立葉協同伍岱進攻等語覽之深爲欣慰不意明亮竟能出息若此前因明亮奏到

吉地後卽遣人細探路徑據稱斯喀爾山梁列有九礮仰攻費力而黃草坪一帶山梁林深箐密數十里內不見賊蹤恐賊人設伏計誘斷不可冒昧輕進因諭令明亮撤兵由大板昭一帶赴阿桂軍營協同進剿今明亮於未奉朕旨之前所奏與朕意適相脗合且朕令由大板昭一路程站尙遠而明亮所奏由周安經卓克采至凱立葉一路僅須十一二日之程較朕旨更爲迅速朕前日之旨於二十二日發往計明亮於初三四日方能奉到今明亮已於二十二日起身初三四卽可到凱立葉較之待朕旨而行又早半月餘似此機緣湊巧明亮益當努力爲之明亮著賞御用玉韞一枚燧囊一件奎林三保和隆武書景阿敷成各賞上用燧囊一件以示獎勵至西路糧運前據富勒渾奏計運到者一萬三千餘石數軍營一月之用今添明亮兵七千每日約需米五六百石富勒

渾卽當一併籌添俾軍食源源得濟明亮到後或卽由凱立葉攻
進或阿桂已抵勒烏圖卽往會剿之處均著迅速具奏

東華續錄

乾隆八十

臣王先謙敬編

臣周瀚蕃恭校

秋七月乙卯諭陳輝祖奏湖北臬司楊仲興於案牘不能細心推鞫勤多竊率請與湖南按察使農起對調一摺所奏非是陳輝祖既稱楊仲興勘鞫案情於分肌擘理之處未中肯綮卽不能勝臬司之任乃又稱其人尙明爽酌調湖南猶堪勝任殊非情理湖北湖南雖省分略有繁簡而臬司爲刑名之總樞則同旣不宜於此又安能復宜於彼豈湖北則懼其貽誤而湖南竟可置之不顧耶楊仲興原非朕所素知之人上年冬以俸滿來京引見觀其人似直爽且任道員年久是以用爲按察使陳輝祖如果見其不堪司臬卽當據實直陳朕必獎其公正乃所奏抑揚並用旣攻其短又

不肯直斥其非必因楊仲興諸事不能相合故欲改移隔省又以
其爲朕所特簡因而曲事調停封疆大臣辦事不應若此陳輝祖
著交部議處至楊仲興因案經指駁心輒生疑遇有公事阻令屬
員不向陳輝祖關白竟欲掣撫臣之肘卽不宜令其仍任臬司楊
仲興著調取來京引見再降諭旨湖北按察使員缺著農起調補
其湖南按察使員缺著鄭大進補授藩臬兩司固朕所簡用而督
撫尤朕所倚畀以察吏者察吏當自藩臬始是以朕於藩臬兩司
凡經督撫奏其不能勝任或改調或另用無不卽時降旨准行卽
如今春裴宗錫奏臬司瑋琦性情偏拗朕知其才不及楊魁遠甚
而又自不服恐故不能與之和衷因將瑋琦調取來京引見後觀
其果實屬年老不及從前因另以京堂補用是督撫之於藩臬又
何所顧忌而必爲之委曲遷就耶然此等習見非公明老練之督

撫每不能免陳輝祖之於楊仲興特其顯然者卽前此裴宗錫面奏瑯琦其詞亦若茹若吐經朕察其底裏始肯盡言恐外省風氣大半如此不可不知改也將此通諭知之○己未諭據阿桂等奏二十二日晚令額森特烏什哈達等帶兵分爲兩路進攻色湖普南面山骹賊碉福康安帶兵接應又令普爾普海祿等進攻喇穆喇穆山梁東邊賊碉保甯彰靄等進攻其次賊碉並令成德特成額等仍於喇穆喇穆左邊山骹進攻海蘭察等直取喇穆喇穆山梁後尾峰巒突起處兩大碉於滿洲吉林索倫及綠營屯土各兵內挑選至勇至健之兵六百餘名分隊潛上二十三日額森特等見海蘭察之兵已抵賊碉之下督兵直奔山骹官兵爭先跳躍越過三道溝濠射殪多賊其普爾普等攻撲喇穆喇穆第一賊碉官兵不避槍石拋放火彈刨空碉根賊窘迫出碉官兵槍箭齊發斃

賊甚眾並射中穿紅衣頭人之胸背帶數箭逃竄成德等將賊人護礮木卡盡力攻開連克石卡四座維時海蘭察等所帶各兵先於半夜月出之前魚貫而上不但並無人聲並將火繩藏起從石壁陡滑處官兵手足攀附而進埋伏礮旁黎明一湧而登直上東邊峰巒突起礮頂砍開礮門躍入礮內將賊眾盡行殺死卽撲進西峰尾礮圍攻奮力勦殺無遺並將木城兩座放火圍燒焚斃殆盡成德普爾普保甯等帶兵冒雨攻圍山梁之礮徹夜無倦賊遂棄礮而遁二十五日早大霧迷濛之際海蘭察等復率兵從喇穆喇穆山梁尾礮乘勢搶殺西南兩道山骹礮卡官兵斬勝之後勇氣倍增並攻克日則丫口各礮卡殲戮多賊此次共計攻得戰礮三十六座木城五座石卡五十餘處平礮一百餘間馬騾十一匹頭殺賊數百餘名活擒賊番二名割取首級二十七顆奪獲劈山

破一位火藥鉛彈鳥槍刀矛口糧等物甚多等語喇穆喇山梁
原爲此路賊人第一要隘山形險絕礮卡最堅而日則丫口亦進
攻勒烏圖要路在所必爭今官兵等皆攀援超越奮不顧身雖遇
雨夜霧晨彌加勇往殺賊砍礮靡堅不破而海蘭察不避艱險每
攻必克尤爲超軼出羣堪稱勇將皆由將軍參贊等相機抵隙調
度有方故能所向克捷朕心深爲嘉悅所有將軍參贊以下鎮將
員弁俱著交部從優議敘其實在出力打仗得功兵丁除交部照
例議敘外仍著阿桂等查明卽賞給一月錢糧以示優獎○庚申
命福建金門通判移駐馬家港○丙寅諭本月十五日慶貴妃薨
逝著輟朝五日派皇六子皇八子皇十二子皇十五子暨順承郡
王恆昌和郡王縣倫果郡王永臻九公主穿孝並著皇六子質郡
王禮部侍郎德明內務府大臣金簡總理喪儀所有應行事宜著

各該衙門察例具奏○諭內地鼓鑄錢文自順治年間以來俱隨年號字樣鑄造至葉爾羌等處向來行使準噶爾騰格錢文自乾隆二十四年平定回部後將所有準噶爾舊錢銷毀另行頒式鑄造乾隆通寶錢文極爲利便回部各城係朕開拓撫定之區國寶流行遵奉朕乾隆年號該回人等所當萬年敬守及我子子孫孫亦當萬年遵行不便照內地錢文隨時改鑄將此諭令各回部辦理大臣記檔永遠恪遵不必改毀另鑄之旨並諭戶工二部一體存載垂爲成憲○戊辰諭軍機大臣等阿桂等奏初五日攻克該布達什諾大礮卡柵上存一大木城卽日可期必克等語覽奏欣慰看來官兵一得此處卽可乘勝直抵勒烏圍自當大有得手佇盼捷音又據覆奏軍營打仗俱係滿兵首先率往卽攻礮奪卡從不專恃土兵等語如此方是金川賊首罪大惡極爲天地所不容

破賊擒渠計日而待今土兵等既知推重吉林索倫勁旅使眾聞之更足令其鼓舞奮勇可期迅奏膚功又據奏初六日辰刻迺看宜喜山梁賊礮數座已均不見但見有官兵營盤七座在上必係明亮等合力奮攻竟已得手等語此更非意想所及尤爲可喜明亮得有勝仗自必奏聞想因程站稍遠不能與阿桂奏函同到約計一二日內亦即可得喜音耳明亮果能從宜喜攻進與阿桂會兵直抵勒烏圍則攻取賊礮自更迅捷又據阿桂稱並可從宜喜正地各山梁下循河而南至噶拉依對岸卽出馬爾邦之路與富德等兩面夾攻自當留舒常仍駐宜喜以防後路兼爲明亮聲援方屬萬安明亮由此路攻進甚爲得力且喜獨當一面其功較之隨阿桂助剿者尤大矣○已已諭據明亮奏達爾圖一帶山梁橫互數里礮卡聯絡實爲賊人喫緊關鍵因會同舒常卽酌量派兵

分頭奮力進剿隨派奎林等帶兵攻取西南第一二兩碉和隆武
三保珠爾格德科瑪噶塔布等各帶兵分攻第三四五六七各碉
每起各派官兵在後策應其俄坡格勒古一帶七碉令都司崔文
傑等帶領綽斯甲布土兵三千協力助剿於七月初四日將近黎
明官兵冒雨直撲碉根勇氣倍壯將達爾圖一帶賊碉皆以次克
獲而俄坡格勒古賊碉七座亦同時全行搶占通計斃賊二百餘
人割獻首級二十一顆耳記三十七件生擒大頭人丹巴阿太一
名散番八名共攻得戰碉十五座平房二十六間搶獲劈山礮四
位牛轂礮二位槍矛精粃什物甚多等語覽奏甚喜達爾圖一帶
山梁爲宜喜一路進攻勒烏圖要隘賊以死力拒守上歲攻剿經
年未能寸進昨據阿桂奏攻克該布達什諾碉殺賊摺內稱初六
日辰刻雲開日出之時遙見宜喜山梁賊人碉卡均已不見但見

有官兵營盤七座在上必係明亮等合力奮攻竟已得手等語朕
彼時以果能如此實出意外之喜因盼明亮軍報尤切今明亮奏
至果以初四日鼓勵將士乘銳直攻達爾圖並俄坡各碉奮迅克
獲實由將軍明亮等抒誠殫力董率有方故能所向克捷從此乘
勝席捲與阿桂隔河並下自可迅擣烏圖賊巢朕心深爲嘉悅
所有將軍參贊以下將領員弁及土司土舍土目均著從優議敘
至此次官兵等冒雨進攻尤爲奮勉出力除交部照例議敘外仍
著明亮查明滿漢官兵及各土兵屯練均賞給一月錢糧以示優
獎○諭軍機大臣等明亮奏攻克達爾圖山梁碉卡覽奏欣慰已
有旨交部從優議敘矣達爾圖一帶賊碉昨歲屢攻未得不意明
亮竟能盡行攻克此皆仰仗上天嘉佑大功應卽告成乃能迅
獲全勝若此而明亮之調度有方領隊大臣等之奮勇直進及兵

丁等之不避大雨踴躍集事均屬可嘉至阿桂札令明亮留兵宜
喜進攻今果能得勝其籌畫甚爲得當卽此可見嫻於勝算而明
亮之勇略並著國家又多一得力之人伊與奎林皆一孝賢皇后
親姪不意其竟如此出息甚爲可喜又節據番人等供俱稱倫格
桑爲索諾木藥死埋在遜克爾宗之旁阿桂於攻克遜克爾宗時
卽應查訪明確刨出賊屍割取首級交文綬於省城暫存俟擒獲
逆酋檻送獻俘時一併解京獻馘○諭兩金川平定後如噶拉依
勒烏圍僧格宗美諾大板昭等處必須安設官兵其餘亦須一例
布置營協相連方爲一勞永逸之計其兵額或由四川內地改撥
備尙不敷卽奏明酌添兵額亦無不可其如何設立鎮協參遊都
守等官及各營兵丁額制總宜於辦理善後事宜時詳細妥定至
各番眾附隸恭順土司者亦當有所專屬應欲將成都副都統移

設打箭鑪如青海副都統之管理番眾仍令理藩院總統之並欲俟兩金川全定後令各土司做照回部伯克之例輸流入覲使其擴充知識得見天朝禮法著將此詳諭阿桂等留心酌辦○壬申諭御史陳朝礎奏請修內閣都察院則例一摺殊可不必各部爲直省案件總匯其常行事例多有因地因時斟酌損益者不得不纂爲則例俾內外知所適從然甫居成書輒有增改故每閱數年或十餘年又復重輯一次並不能爲一成不易之計至內閣固爲絲綸重地然收發章疏繙本票籤及承辦誥敕寶冊等事並有一定章程止須遵循罔敦遇有改籤事件則係朕親閱本章折衷酌定特降諭旨皆非閣臣所能參與又豈或有成例可稽若都察院雖風紀攸司而事非繁劇如監禮糾儀稽察巡查奏派諸務悉係奉行成憲並無庸臨事權衡是閣務院規均不過恪守舊章非若

六部比擬例案必須互證兼資者可比又何必附纂例之故套而爲無益之虛文乎至摺內謂都察院舊稱副相尤屬可笑漢時雖有御史大夫掌副丞相之語其後沿革不常且與今都察院之職迥異何得牽引及之况內閣自明初改置大學士以來卽不復稱宰相閒遇賜詩賜扁時或數典及之而諭旨奏章從無相臣名目內閣且然都察院安得有副相之稱乎向來大學士加宮保銜者有之獻諛者或稱爲師相究無益於實而彼亦居之不疑殊可鄙耳朝廷設官分職自當從定制相稱若必援古爲言則名之不已寔及於事必且有如當年之爭六科不應屬都察院者何可爲訓陳朝礎雖行文一言亦不可不防其漸原摺著發還將此通諭知之○甲戌諭前兵部侍郎高樸來熱河帶領引見詢以近日外閒有何見聞據奏風聞內監中有將記名人員硃批記載洩漏外廷

之事朕尙以爲必無因問其有何實據伊所奏含糊惟稱係管理記載身材矮小之內監不知姓名卽令福隆安詳悉詢問始據高樸稱覲保蔣賜榮吳壇俱曾在九卿班上談及道府記載優劣問以得自何人仍無實據等語經福隆安據情轉奏朕以所言旣無實據因暫緩究問隨將太監高雲從撤至別處當差不令經管記載昨朕面詰高雲從因何與蔣賜榮識認交言所指仍係記載一事乃所供則稱伊買地受騙具控會懇大學士于敏中轉託蔣賜榮辦理等語朕聞之不勝駭異隨面詢于敏中據奏高雲從向伊面說並未允爲轉託但不卽據實參奏實屬錯謬等語內廷諸臣與內監等差使交涉事所必有若一言及私情卽應據實奏聞朕方嘉其持正重治若輩之罪又豈肯以語涉宦寺轉咎參奏者耶于敏中侍朕左右有年豈尙不知朕之辦事而思爲此徇隱耶在

高雲從供有于敏中曾向伊問及觀亮記載若何之語于敏中以大學士在軍機處行走日蒙召對朕何所不言何至轉向內監探問消息耶自川省用兵以來于敏中書旨查辦始終是其經手大功告竣在即朕正欲加恩優敘如大學士張廷玉之例給以世職乃事屬垂成而于敏中適有此事實伊福澤有限不能承受朕恩于敏中甯不知痛自愧悔耶因有此事相抵于敏中著從寬免其治罪仍交部嚴加議處至朕日理庶政事事躬親即所寫諭旨亦時多更改至筆墨之事尤不過尋常錄寫豈藉一二翰林所能 assists 助即如從前大學士公傳恆侍直禁近最久襄贊諸務及伊身後並不因少此一人遂至不能辦事于敏中豈不稔知朕因其數十年以來小心行走因爲此姑息格外加恩免其重罪朕先認過于敏中務宜痛自湔洗以蓋前愆儻此後再有過犯朕不能復爲曲

貸也至觀保屢次獲罪本一庸材更何心覲顏論事而蔣賜榮吳
壇皆新進平等材具止宜恪勤供職何可於九卿班上議論道府
朕於用人黜陟權不下移豈在下所能窺測伊等議論優劣其意
何居且其所議論者何人何事觀保蔣賜榮吳壇身爲九卿豈宜
如此多事俱著革職交刑部查審並著伊等各將議論情節明白
錄供由刑部堂官具奏又高雲從供倪承寬亦曾與伊認識並有
引令申保見面之語倪承寬在上書房行走豈可如此行爲其欲
引令申保相見又係何意倪承寬亦著革職交刑部訊問仍著申
保明白回奏所有戶部侍郎員缺著金簡補授其錢法堂事務著
梁國治管理梁國治未回京之先卽著金簡暫行兼著順天府府
尹事務著袁守侗兼管所有鄉試監臨卽著袁守侗辦理梁國治
見在隨園袁守侗不必來京更換將此通諭中外大小臣工知之

○諭太監高雲從一案所降諭旨並訊出供詞俱著鈔寄舒赫德閱看提集應訊人犯逐件審究定擬具奏此內蔣賜榮尤非觀保等可比伊係大學士蔣溥之子乃夤緣滋事除審明照例治罪外並令自行議罪將此一併傳諭知之○諭軍機大臣等此次海蘭察等因將軍先有號令遇雨卽撤尙非退縮而額森特卽於雨霧中帶兵攻得木城甚爲勇往蓋額森特見海蘭察屢次立功居多亦思奮勉自勵故不避雨瀟將二木城立時攻拔而富興普爾普等並皆盡力助勢烏什哈達亦聞聲攻得旁卡二座均係可嘉著阿桂將該將領等及出力之弁兵查明存記統俟攻得勒烏圖時咨部一併優敘至得受槍傷之侍衛碩多爾海章京興奎協領資里克是否無恙深爲軫念著遇便奏聞其傷亡官兵俱著查明咨部照例卹賞又同日明亮奏西南下拖山要隘賊卡初六日派

三保珠爾格德阿爾都前往占據連築二卡見已壓至山半其相連之木克什山梁兩面斜插山骸列礮其上皆足以繞我之後必須一併勦洗業已搶得兩礮所辦亦好看來阿桂明亮兩軍隔河相望聲勢甚盛賊人氣餒自可迅速成功佇盼捷音至閩所獲賊目丹巴阿太供詞據稱金川知官兵欲攻正地在樹林內要隘地方派人埋伏專等官兵進來下手等語是明亮前次不由正地進兵幸不墮賊詭計尤爲得算至彭楚克供丹巴沃咱爾聞官兵已得達爾圖山梁卽添調各寨百姓親自帶領分開各處防守等語丹巴沃咱爾是賊中之狡惡者逆酋恃以領兵今伊既赴宜喜抵拒明亮等當留心防範勿稍疏懈若得生擒此賊較索諾木尤爲可喜並令舒常知之○以阿思哈爲左都御史由左副都御史遷胡季堂爲刑部侍郎由江蘇按察使遷范時紀爲倉場侍郎署禮部侍郎○乙亥諭昨

高樸奏太監高雲從洩漏道府記載一案降旨將觀保蔣賜棨吳
壇倪承寬等革職交刑部查審朕辦理此事並不得謂之過嚴我
朝家法太監止供使令從不許干涉政務至於外廷臣工尤當禁
絕往來若聽其識認交言實非善事卽如蔣賜棨於高雲從買地
一案雖未爲辦理然當此政治清明之時伊等尙不敢任意妄爲
若此次不行整飭將來不知何所底止又如倪承寬因在內廷行
走識認高雲從乃又欲引同官之申保亦與認識尤不可解至於
記名道府用硃批記載乃 皇考世宗憲皇帝留意人材以便隨
時錄用實屬法良意美所當永遠遵守至於所用道府亦不過照
例補放或後經該督參劾朕亦從無庇護若其中果有人本平常
或夤緣倖得九卿等確有實據何妨據實參奏朕必爲之嘉獎又
何所容其私相議論乃觀保等旣不能指實直陳徒於班聯之上

妄行竊議意欲何爲况觀保本屬庸材屢經獲譴蔣賜擘吳壇甫
經擢用尤宜恪勤奉職又何暇評論人材乎此事高樸初奏朕尙
以爲必無於召見軍機大臣時論及此事察于敏中所奏尙欲意
存迴護希冀顛預了事今據審出卽有與伊干涉之事是于敏中
尙不能在朕前稍存飾混况他人乎朕臨御三十九年勵精圖治
宵旰不遑正賴神志清明覺察眾人情僞不容輕易溷過從前雖
有志願至八十五歲時卽當歸政然亦必酌量彼時精神與此時
無異不致倦勤若此日正當精明強固可以振作有爲之時豈容
於此等事竟置不問乎今據審出案情屬實則高樸所奏尙具有
良心何九卿中屢經召見並無一人奏及若與高雲從素有關涉
者自不肯直奏糊塗如蔡新者或不能舉發其餘九卿豈直一無
見聞又豈朕不肯召見九卿耶卽如英廉係內務府大臣於內廷

諸事最爲熟悉舒赫德到京已將一載在軍機處行走此等情事豈有不知乃高樸尙有見聞豈英廉舒赫德竟得諉爲不知朕開誠布公以待諸臣而諸臣轉不能竭誠盡力以圖報效諸臣清夜自思良心安在舒赫德英廉著傳旨嚴行申飭九卿等亦著一併申飭朕因此事大有關繫特行剴切教誡並通諭中外臣工知之○命左都御史阿思哈軍機處行走○以龍承祖爲江蘇按察使由郎中遷○丁丑諭軍機大臣等見在查審太監高雲從招搖滋事案內訊出李文照放粵海關監督時聽受高雲從屬託攜帶伊弟高雲惠爲長隨一事太覺膽大昨已降旨將李文照革職拏解來京交內務府嚴審矣向來內務府官員好與太監結交實係最惡習氣今朕因李文照在如意館行走多年小心勤慎是以用爲監督乃甫經加恩卽聽太監屬託徇私收錄實係其福薄不能承受朕

恩況太監等兄弟子姪止宜在屯務農或小本營生度日是其正理今乃跟監督充當長隨其意不過欲在關口婪索舞弊累商竊課皆所不免豈可不急行嚴禁今李文照見經敗露朕卽將伊斥革拏問治罪可見與太監往來非惟無益且必身獲重譴後悔莫及李文照卽是眾人榜樣凡內務府官員俱宜引以爲戒痛自儆省毋蹈覆轍此後儻有犯此者朕不能稍爲寬貸也著交內務府大臣將此傳諭內務府官員知之○諭軍機大臣等昨審訊太監高雲從供有高雲龍在臨清州當長隨外任知州因何得與太監認識收留伊弟爲長隨是以令徐績查明知州何人革職嚴訊矣今覆審高雲從據供並不認識臨清州知州係託會押貢到天津之參將王普懇祈將伊弟高雲龍帶往山東尋覓跟官後得信知已在臨清州魏家灣坐口等語太監高雲從既不認識臨清州知

州則與該州無涉毋庸革職審訊至王普身爲武職大員乃敢與太監認識聽其屬託將伊弟代薦長隨殊屬不堪著傳諭徐績卽將王普革職嚴審確情具奏將此由六百里發往諭令知之○諭據舒赫德等奏查審觀保等議論道府記載一案並觀保等自行同奏各供詞均非確切實情如觀保所供因在內廷行走凡九卿一切公議總不會到班之語卽屬巧爲支飾意欲藉此推託乾淨九卿不必定因公事會議始行見面卽如衙門進朝奏事及赴圓明園該班之日在九卿朝房與同列聚談乃事所必有况聞伊之竊議者猶多豈得轉謂之不交一言乎伊若據實供吐尙可稍爲寬恕若巧爲推諉則其取戾益重著舒赫德再行嚴訊確供毋得任其掩飾至吳壇由刑部司員擢任藩司特升卿貳朕因其材具尙堪造就是以加恩錄用並不因人薦舉卽舒赫德劉統勳係伊

舊日堂官尙不能在朕前將伊保奏豈太監等所能干與又何用向其探聽記載希圖倖進乎朕方以吳壇尙有出息將來擬欲用爲江蘇巡撫或日久並可簡任刑部尙書今伊福薄不能承受朕恩實其自取罪戾至所供與永德談及江蘇官員之事乃泛論舊日屬員賢否原無關礙今所問乃打聽道府優劣與此何涉此乃吳壇心靈故認實此節以躲避重懲至蔣賜棨爲楊仲興探問消息雖已供明而於探聽道府記載一節未經認及總係因其罪過重不敢直認著舒赫德將伊等如何私議道府記載及所論何事何人嚴切訊明據實奏覆至向來內廷行走諸臣如軍機處懋勤殿南書房及月華門等俱有太監在彼伺候茶水歲時閒有犒勞給銀之事朕平素深知原所不究若吳壇外廷大臣與若輩毫無交涉尤不應給以銀兩此等情節均應詳悉訊問據實覆奏至劉

秉愼王慶長不過微末小臣非九卿大員可比既經革職足以蔽辜無庸再爲究問將此傳諭舒赫德等知之○己卯諭向來在京部院各衙門陳奏事件及外省督撫等齎奏差弁赴宮門具摺設有奏事官員接遞轉交奏事太監進呈所以嚴內外之防使宦寺人等槩不得與外人交接法至善也乃近來奏事官員日久懈弛致有山東隨至天津之參將王普與太監高雲從認識屬託高雲從不過寫字處下賤太監何得與外省參將相識則是太監等與外廷官員在宮門覲面交談之處大槩可知奏事處向派有御前侍衛一名管理原以查察各項弊端今春甯在奏事處於此等情事不能稽管所司何事春甯不必管理奏事處仍交御前大臣等議罪另派安泰代管安泰向曾管理此事今行走雖不及昔日而稽查管束尙所能爲務宜小心謹慎若再有太監與外廷官員人

等在宮門交言讖面之處惟安泰是問嗣後除軍機處應奏事件仍照舊交奏事太監呈進外其餘各部院衙門奏摺俱係奏事官員接收轉交卽內務府衙門一切事件雖係家務亦著由奏事處官員轉交槩不得由奏事太監等接奏大臣官員等並不得與太監交談如敢再有違犯必將伊等從重治罪著將此旨嚴切曉諭奏事處及各衙門知之○御前大臣行在刑部奏太監高雲從結交外廷官員洩漏記載招搖滋事不法已極依律擬斬請卽正法得旨高雲從著卽處斬○庚辰諭據舒赫德等奏覆訊觀保等私議道府記載一案仍各堅不承認請加刑訊等語辦理非是觀保等明知交結內監探聽記載情罪重大冀圖躲避重愆不肯供認設伊等果無其事高樸何能憑空捏造至所稱九卿同在一處不敢妄行私議九卿具在豈肯盡爲隱瞞之語更屬荒唐此等口舌

案件原無憑據九卿等誰不欲置身局外此時卽問之九卿又孰肯爲之質證况九卿除觀保等外豈無探聽記載未經高樸指奏之人朕亦不屑因此一一窮治遠興大獄也至刑部請旨刑訊之處殊屬無謂伊等皆一二品大員卽加刑訊亦不過用刑套問虛應故事伊等若復堅供如前刑部又如何辦理豈因觀保等不肯承認轉將高樸究訊坐以誣奏之罪尙復成何事體且此後誰復肯以眾人之情僞據實直陳耶刑部此奏不過因不能訊取確供欲激朕以用刑朕辦理庶政一秉大公至正此等案件旣經敗露自應明白曉諭示以重懲然又豈肯稍爲過當如觀保等探聽記載竊議道府優劣一節伊等雖狡詞隱飾按之於理其肺肝自不能掩朕今亦不復究試令觀保等捫心自問又豈能盡昧天良乎高雲從見已照御前大臣及行在刑部所擬卽行正法所有觀保

等一案著刑部按律定擬具奏並將此旨通諭中外臣工知之○
辛巳諭昨刑部奏覆訊觀保等探聽記載一案朕本不欲窮究其
事是以不復再行詰問並非伊等之堅供狡飾所能混過也卽吳
壇係外廷卿貳並不在內廷行走何由與太監高雲從認識又何
以知其爲經營記載之人向伊探問且旣探聽自己記載必無不
兼及他人之理又如蔣賜棨因其父兄舊直內廷得與太監等相
識但旣向高雲從探聽記載必不僅止楊仲興一人况楊仲興係
廣東人蔣賜棨不過因係年誼爲之探聽則凡與蔣賜棨同鄉親
故應自不少豈無一關切之人而爲之舍近問遠有是理乎若觀
保本係庸劣無能之人辦公事則緘訥不語遇私議則談論風生
此眾所共知者使非有竊議記載之事高樸豈能憑空捏造且何
以不指他人而指觀保乎刑部審訊時若以此等情節細加研詰

若輩復將何辭抵賴其在智慮短淺之人或不能參此情僞舒赫德英廉豈不見及於此何不聞其以此悉心推究僅據尋常審案不喫緊之言漫爲鞠訊希圖搪塞完案而謬請刑訊蓋知朕必不肯令刑訊也此一節著舒赫德英廉明白回奏朕辦理庶政不肯稍涉顛預亦不肯稍爲已甚是以養心殿聯有仲尼不爲已甚者惟帝若是其難之之語朕之心事如此而爲君之難亦卽在此卽如此案高雲從以下賤太監敢於肆無忌憚若此豈可不亟爲整飭以肅紀綱但不屑因此遽興大獄故將高雲從卽行正法不復一一窮治豈觀保等所能狡詞倖免乎觀保蔣賜榮吳壇等清夜捫心若自知身獲重愆朕加恩不爲窮究感愧無地尙得謂之少有人心若觀顏以爲實無其事甚至少涉怨尤致無知之徒聞之妄以觀保等爲無辜受誣且議高樸爲小人多事則觀保等良心

漸滅殆盡必爲天理所不容尙得比於人類乎高雲從之事大臣中豈無見聞獨高樸爲之陳奏眾人撫躬內省對高樸應多自慚然此乃大臣應奏之事朕並不以此賞鑒高樸重加任用若眾人因高樸具奏此事私心銜恨計圖巧爲傾陷則是自取其死豈能逃朕洞鑒若高樸以此沾沾自喜遂因而高興多事卽屬器小易盈或高樸因此事已顯其公正不復自知謹懍肆意妄爲轉致營私舞弊則高雲從卽其榜樣朕亦不能稍爲曲貸也將此通諭中外知之○諭據阿桂等奏於七月十八九等日派撥官兵分路進剿將賊境該布達什諾甲得古色溯普山駁碉卡木城悉行攻克並焚燒格魯瓦覺各處寨落共計攻得戰碉二十三座木城九座石卡六十餘座燒毀寨落七十餘處碉房數百間殲殺賊番男婦老幼三四百名奪獲軍火器械口糧牛羊等物甚多見在統率勝

兵進圍遜克爾宗等語連日正盼捷音覽奏深爲欣悅大兵屢次攻克要隘我武更揚賊膽已破見已乘勝深入指日當迅掃賊人巢穴早奏膚功皆由將軍參贊等善於用兵調度有方領隊鎮將等於地利軍情俱所熟悉故能動合機宜深爲嘉尙均著交部從優議敘其在事出力打仗得功官兵並著查明咨部議敘以示鼓勵○諭軍機大臣等阿桂調度得當可謂善於用兵而海蘭察額森特尤爲勇略超羣是以一路賊人險隘俱經官兵攻克遜克爾宗正可乘勝勦取直抵勒烏圍據稱其地止有一面可以仰攻或當斷其水道或從拉枯喇嘛寺繞截其後自不難於得手等語就圖而論拉枯喇嘛寺卽在見得格魯瓦覺之旁勢亦不可不取若先攻克拉枯喇嘛寺卽由彼繞擊遜克爾宗之後甚屬便捷可以一舉兩得阿桂等自必計出於此也同日明亮奏奎林又將木

克什山頂一碣用礮轟摧殲戮賊眾甚屬奮勉俟將達爾圖一帶
碣卡盡數剋洗壓下再行優敘至前次聞丹巴沃咱爾赴達爾圖
抵禦今明亮聞索諾木亦親來救援丹巴沃咱爾乃賊中之最狡
黠者諸事宜加意嚴防而逆酋索諾木親至其地賊眾自更爲之
捨死用力但賊酋賊目實皆罪大惡極爲覆載所不容明亮若能
設法將索諾木丹巴沃咱爾一併俘擒其功實爲不小務須努力
爲之但大功正屆將成尤當動出萬全不可稍有絲毫罅隙爲賊
所伺方爲妥善將士等亦不可因屢勝之後志足意滿稍涉驕矜
或致疏於防範

八月壬午朔日有食之○諭軍機大臣等郭羅克賊番見雖不能
滋生他釁然其人窮很無依志在乘便竊劫內外商旅頗受其累
而內地逼西藏尤不可不急示嚴懲况郭羅克較諸番更難化誨

其所以不至如兩金川之跳梁者因見無與索諾木莎羅奔丹巴沃咱爾相類之人故不敢肆逞萬一有之未嘗不能爲害不可不思患豫防阿桂前著四川總督時曾辦郭羅克之事必深知之此輩兇惡窮番向由地方官管轄而庸劣文武旣不能撫之以禮又不能懾之以威當平常無事則縱兵役作踐視之不啻如禽畜及略爲作梗則圖遠避畏之又不啻如虎狼實爲有損無益朕深以此爲念並料索諾木等窮蹙時必逃郭羅克以冀稍緩須臾之死業已傳諭各路邀截或逆酋竟乘空逸出不可不卽速追擒郭羅克境雖略廣然地勢平坦非若金川之有險可憑如果逆酋竄往阿桂卽當提連勝之兵壓境擒渠並討郭羅克賊番之罪實爲一舉兩得若逆酋並不逃往則無故移師朕又不肯爲此窮兵黷武之事止可於辦理善後時使之有恩可感有威可畏庶可以潛消

桀驚之心而束之法度之內方可謂之一勞永逸○癸未諭軍機大臣等前會諭令各督撫採訪遺書彙登冊府下詔數月應者寥寥彼時恐有司等因遺編中或有違悖忌諱字面懼涉干礙而藏書家因而窺其意指一切祕而不宣因復明切宣諭卽或字義觸礙乃前人偏見與近時無涉不必過於畏首畏尾朕斷不肯因訪求遺籍於書中尋摘瑕疵罪及收藏之人若仍前疑畏不肯盡出所藏將來或別露違礙之書則是有意收存其取戾轉大所降諭旨甚明並寄諭江浙督撫以書中或有忌諱誕妄字句不應留以貽惑後學者進到時亦不過將書毀棄轉諭其家不必收存與藏書之人並無干涉至督撫等經手彙送更無關礙朕辦事光明正大各督撫皆所深知豈尙不能見信於天下該督撫等接奉前旨自應將可備採擇之書開單送館其或字義觸礙者亦當分別查

出奏明或封固進呈請旨銷毀或在外焚棄將書名奏聞方爲實力辦理乃各省進到書籍不下萬餘種並不見奏及稍有忌諱之書豈有裒集如許遺書竟無一違礙字蹟之理况明季造野史者甚多其間毀譽任意傳聞異詞必有詆觸本朝之語正當及此一番查辦盡行銷毀杜遏邪言以正人心而厚風俗斷不宜置之不辦此等筆墨妄議之事大率江浙兩省居多其江西閩粵湖廣亦或不免豈可不細加查覈高晉薩載三寶海成鍾音德保皆係滿洲大臣而李侍堯陳輝祖裴宗錫等亦俱係世臣若見有詆毀本朝之書或係稗官私載或係詩文專集應無不共知切齒豈有尙聽其潛匿流傳貽惑後世不知各該督撫等查繳遺書於此等作何辦理著卽行據實具奏至各省已經進到之書見交四庫全書處檢查如有關礙者卽行撤出銷毀其各省繳到之書督撫等或

見其書有忌諱撤留不解亦未可知設或竟未交一關礙之書則恐其仍係匿而不獻著傳諭該督撫等於已繳藏書之家再令誠妥之員前往明白傳諭如有不應存留之書卽速交出與收藏之人並無干礙朕凡事開誠布公旣經明白宣諭豈肯復事吹求若此次傳諭之後復有隱諱存留則是有心藏匿僞妄之書日後別經發覺其罪轉不能追承辦之督撫等亦難辭咎但各督撫須派委員善爲經理毋得照常通行交地方官辦理不善致不肖吏役藉端滋擾將此一併諭令知之○丁亥諭軍機大臣等伍岱奏於凱立葉谷噶兩路中間造卡駐防所辦甚屬妥善將軍阿桂等業已統兵入惟恐後路或有賊人潛來侵擾今伍岱自凱立葉至保甯營卡均已駐兵防守是將軍後路連續相通儘可無慮伍岱所辦可嘉此時惟俟大兵將抵賊巢豐昇額領兵埽蕩凱立葉後

伍岱卽將彼處之兵酌留防守其餘帶往黨壩以禦逆酋奔竄○
戊子建古城城垣並添設領隊大臣一○庚寅諭明亮奏攻取賊
匪礪卡槍子從奎林辦頂打進從顛門頭皮透出尙未傷骨等語
奎林自赴軍營以來感戴朕恩每遇打仗勇往向前此次受傷雖
未至骨諒亦不輕朕深爲軫念今已愈否遇便奏聞著加恩將朕
所佩荷包賞給仍授爲都統○諭軍機大臣等阿桂等奏官兵攻
取遜克爾宗前面礪卡殲斃賊眾並燒毀其旁近寨落覽奏實爲
欣慰同日明亮奏到稱近攻前敵四礪已取一礪殺賊無數奎林
頂被槍傷覽之深爲廕念奎林平日打仗最爲勇猛今辦頂受傷
部位最關緊要卽幸而調養無虞自不便仍帶兵行走惟是明亮
處能帶兵之人本屬無多今奎林見須養傷則得力之人更少因
思奎林雖不宜勞力而坐守尙可優爲莫若令赴富德馬爾邦軍

營代富德防守換富德迅至明亮軍營協同進剿富德俟奎林到營後兼程迅赴宜喜毋稍延緩至此兩路情形阿桂一路自更易於得手並據稱相機斷其水路遜克爾宗自歸掌握所見甚爲扼要果爾則官兵乘勝深入更有席卷之勢阿桂一至勒烏圖則達爾圖之賊必且不攻而潰至於斷賊水道最爲上策朕昨年計畫及此曾屢諭將軍等籌辦今阿桂處旣用此法明亮何不倣而行之第明亮一路賊人扼守甚堅見破碉殺賊雖足懾賊眾之膽但此次官員受傷者亦覺稍多明亮於攻剿時倍加慎重方爲妥善至穆塔爾等在烏噶爾角克碉一帶投查賊匪訪獲割麥番民旣得其糧食復殲擒番眾男婦所辦甚好功噶爾拉賊雖防守此時諒無能爲俟官兵攻得勒烏圖此等零星賊匪自皆不能存住但見尙有匪一切防守不宜稍有疏略此乃長青旺保祿等專責伊

等均當實心妥辦毋稍玩忽干咎○壬辰諭富德奏攻打穆當噶爾羊圈等處見克石碉九座大木城一座石卡三十餘處殺賊八十餘人官兵均屬奮勇出力而荊州滿兵百名因曾降旨訓飭咸思奮勉爭先力圖報效等語前自攻克緘布寨以來距今已經數月今富德督率官兵奮力攻得碉卡木城殲戮賊眾甚屬可嘉所有此次富德所帶打仗各兵丁及屯土兵練等俱照阿桂明亮軍營之例各賞給一月錢糧至荊州滿兵能知感愧奮不顧身並著加恩一體賞給以示鼓勵○丙申諭軍機大臣等據山東巡撫徐績將太監高雲從之弟高雲龍擊解至熱河審訊據供乾隆三十六年春聞高雲從替求了按察使薦與臨清州萬縣前派在魏家灣坐口子等語姚立德係外省官員本不應與太監認識况彼時已爲臬司大員當高雲從將伊弟託其收爲長隨之時卽應據實

參奏方爲持正朕必深爲嘉與乃竟面爲允許及高雲龍到山東時又轉薦與屬員其獲譴甚大蔣賜榮等卽其榜樣本應從重治罪但念姚立德自擢用總河以來於修防蓄洩事宜實心經理諸事妥協特爲格外加恩姑從寬免其究問著姚立德自行議罪具奏姚立德當益加愧悔感激力圖報效以贖前愆○丁酉 上自避暑山莊巡幸木蘭行圍○定月選漢官自正六品以下小京官一體引見例○癸卯諭倪承寬獲罪之由第因與申保同在朝門見高雲從經過向其稱說此是申倉場其情罪較蔣賜榮吳壇尙輕倪承寬著加恩釋放賞給翰林院編修仍在阿哥書房行走○諭軍機大臣前因近萬壽節據刑部恩恩將觀保蔣賜榮吳壇倪承寬四人俱問擬斬監候彼時並未分別降旨止予依議欲俟該部將另有詳訊來奏茲候之多日並無奏摺則不得不明降諭旨

矣如倪承寬第因與申保同在朝房見高雲從經過向高雲從稱此是申倉場其過甚小非若蔣賜榮吳壇之實有向高雲從探問記載給與銀兩之事乃竟一例科罪其意何居又如觀保於議論記載一事並不承認刑部亦槩行擬以斬候供罪未明轉使無識之徒妄議其以無辜受屈朕從來辦理庶務從不顛預了事舒赫德等豈尙不知在舒赫德等之意不過以此四人問擬斬候將來必有加恩之處此等見識甚屬錯謬見屆朝審之期各案均須就其實情覈辦今此四人罪蹟不同若竟漫無區別成何信讞况朕卽欲加恩亦須俟案情問明酌量定奪豈有聽其如此朦朧混過朕何如主豈若漢獻帝明神宗之爲臣下蒙蔽乎前因舒赫德等訊問未得肯綮會爲切實指示如吳壇係外廷卿貳並不在內廷行走何由與太監高雲從認識又何以知其爲經管記載之人向

其探聽且既探聽自己記載必無不兼及他人之理又如蔣賜棨因其父兄舊直內廷得與太監等相識但既向高雲從探聽記載必不僅止楊仲興一人况楊仲興係廣東人蔣賜棨不過因係年誼爲之探聽則凡與蔣賜棨之同鄉親故應自不少豈無一關切之人而爲之舍近求遠有是理乎若觀保本係庸劣無能之人辦公事則緘訥不語遇私議則談論風生此眾所共知者使非有竊議記載之事高樸豈能憑空捏造且何以不指他人而指觀保乎刑部審訊時若以此等情節細加研詰若輩復何辭抵賴何不聞其以此悉心推究僅據尋常審案不契緊之言漫爲約訊希圖搪塞完案乎前降諭旨甚明舒赫德英廉於接奉諭旨後惟自稱糊塗未想到認罪並不復爲究問舒赫德英廉前此卽未想到經朕指示代爲之想到矣又何以不照所諭加以詰問且復蒙混擬罪

具奏實不可解舒赫德英廉平日皆明白能辦事之人且係朕所信任大臣今如此辦事成何刑部成何大學士伊等能不自愧乎舒赫德英廉著傳旨嚴行申飭除倪承寬另降諭旨外著將觀保蔣賜棻吳壇照所諭各情節另行訊取確供據實具奏○己酉江南老壩口河溢○庚戌阿桂等奏官兵環攻遜克爾宗賊人力竭勢窮十五日金川頭人綽窩斯甲將僧格桑屍匣創起呈獻並將僧格桑之妾側累及小金川頭人蒙固什咱阿拉一同獻出並稱七圖安塔爾見在患病隨後亦即拏獻臣將所獻側累等一併拘留其僧格桑屍身已令割取首級交文綏暫存省城俟拏獲索諾木弟兄及大頭人時一併獻俘諭阿桂等籌辦遜克爾宗築柵鑄礮日漸就緒自可剋期集事見屆大功將成倍宜慎重阿桂不欲令官兵輕率撲礮所見極是至所奏金川賊人將僧格桑屍身及

側累等呈獻到營阿桂等僅予拘留仍照常攻打不稍弛懈所辦
尤是側累等固應解京嚴訊但不過解審之犯止應選派妥幹員
弁嚴行管押毋任疏脫不得謂之獻俘直待擒獲索諾木兄弟方
可行獻俘之典至僧格桑之妾雖已獻出而其妻則不肯同獻自
係索諾木因其親姊之故若是則金川所獻仍屬賊中無關緊要
之人其肺肝自不能掩阿桂當時何不以此語詰之乎又據奏伍
岱在阿桂處既須留辦分剿分防之川卽毋庸前赴黨壩著阿桂
檄知五福妥爲防範至各土司見金川滅亡在卽俱欲借此除害
並立功邀賞誠心歸順不敢疏縱似屬可信攻破賊巢之後逆酋
諒無從免脫亦不虞其自戕惟丹巴沃咱爾狡惡異常恐未必肯
束手就縛務必設法生致檻送京師又諭逆酋索諾木莎羅奔兄
弟及助逆之大頭目如丹巴沃咱爾蒙固阿什咱阿拉七圖安堵

爾等罪大惡極神人共憤就擒之日自應解京誅磔以快萬姓觀瞻其餘逆番頭目人等著卽就軍前凌遲正法以釋我軍憤恨且使各土司番夷咸知炯戒

九月辛亥朔明亮奏臣等奉諭將俄坡一帶賊碉剿淨隨派和隆武先往將前二碉用礮轟摧旋於十六日進攻是日大霧迷濛分四股並下和隆武先將第一碉攻克其第二碉派珠爾格德進攻第三碉派三保旁有大石卡一座派阿爾都進攻併力齊進賊棄碉逃逸正乘勝追殺援賊奔至綽斯甲布革布什咱土兵繞出其後賊見來路將斷捨死搏戰官兵注矢圍射滾崖落箐者無數餘四散奔竄諭軍機大臣等此次攻剿碉卡和隆武首先攻克珠爾格德三保阿爾都等亦各奮勉出力甚屬可嘉而滿洲吉林索倫官兵聚射賊眾矢無虛發甚爲得力並著明亮等存記檔案俟達

爾圖一路全行政得交部一併議敘其在木克什山嚴繞截賊眾之緯斯甲布革布什咱土兵亦著明亮量爲獎賞以示鼓勵○王子諭觀保蔣賜榮吳壇身爲大臣不知安分奉職觀保輒敢私議道府優劣蔣賜榮吳壇甚至有向太監高雲從探聽記載之事其罪均無可追幸當朕勵精圖治朝政肅清之時伊等尙不敢任意妄爲否則不知何所底止是以不得不嚴爲審究以飭綱紀今據舒赫德等將觀保蔣賜榮吳壇復行提出反復研詰雖供辭俱無指實而愧悚已如見肺肝本爲法所不貸但念其尙無交通結納行賄營私大弊觀保蔣賜榮吳壇俱著加恩釋放觀保著以無頂帶人仍在阿哥書房行走效力贖罪○諭前因太監高雲從之弟高雲龍在臨清當長隨拏解審訊據供此次在魏家灣坐口係東昌府胡德琳薦與知州王溥其前此乾隆三十六年春閒係高雲

從懇求按察使姚立德轉薦與前任知州萬縣前等情已降旨將胡德琳萬縣前等革職令徐績嚴行審訊具奏俟徐績審明到日另降諭旨至姚立德係外任官員本不應與太監認識况彼時已爲臬司大員豈可將太監之弟轉薦屬員因傳旨詢問姚立德令其據實具奏今據覆奏實係允許高雲從之懇求將高雲龍轉託東昌府胡德琳代爲轉薦獲罪負恩實屬法無可追惟有懇請從重治罪等語姚立德由道員臬司用爲總河初不料其人竟至如此實出情理之外本應照結交近侍官員之律重治其罪但念姚立德自擢用總河以來於修防蓄洩事宜尙能實心經理諸凡妥協姑從寬格外加恩免其究問姚立德著革職並革去頂帶花翎仍留總河之任八年無過方准開復○甲寅諭外省道府大員於外姻親屬同在一省爲丞倅州縣等官者向來原無迴避之例近

因蔣賜榮條奏經部議覆准行自定例以來旋據周元理節次具奏如良鄉縣知縣張璿磁州知州陳煥吳橋縣知縣王倜順天府北路同知王裕銓永定河北岸同知王榮保定府理事同知嵩阿禮俱係本省道府外姻戚屬例應迴避紛紛具奏因思外姻爲類甚繁若因其誼屬姻戚恐有徇私瞻顧之弊卽非本屬亦應迴避則凡年家世誼同任一方者正不乏人且有交情親密甚於姻親者豈能一一槩令迴避此等人員惟在該督撫實力留心體察自不至瞻徇營私原不在科條繁設今新例甫行而直隸一省已多至如許其餘他省恐復不少且或調往他省又有應行迴避之人徒令僕僕道途於公事轉無裨益所有道府大員內外姻親除本屬仍照舊迴避外其隔屬迴避之例著該部另行妥議速奏尋奏各省道府大員內外姻親除本屬州縣丞倅等官仍遵旨照舊迴

避外所有外姻親屬隔屬迴避之例應請停止惟責成督撫大員不時查察儻屬員有隔屬姻親展轉屬託徇私瞻顧情弊立即指名嚴參如該督撫徇隱不奏別經發覺照徇隱不舉例降級調用從之○諭進哨後外有摺奏著兵部派司員住哨門外接收按日馳送披覽著爲例○乙卯諭軍機大臣等徐績奏據署臨清州知州秦震均等稟報八月二十八日起更時堂邑縣張四孤莊有奸民王經隆等率領多人手持兇械放火傷人該署知州卽同副將親往查拏等情又據壽張營守備王廷佐稟稱八月二十八日四更時有賊人聚眾白布纏頭各帶器械爬入壽張縣城內圍住文武衙門搶劫倉庫占據城池守備正在催漕聞信星夜馳回飛調各汛弁兵並移知梁山范縣東昌三營同力協拏等情閱稟卽率同布政使國泰中軍參將海明帶兵由東昌一路進發並飛咨兗

州鎮臣惟一帶兵由東阿一路進發督同擒拏各等語此等奸民實爲罪大惡極然么磨烏合不過自速其死計徐績惟一到彼會勦自可迅卽就擒但各犯敢於圍官署劫倉庫據城池其情罪甚爲重大卽當按叛逆辦理非尋常糾眾抗官可比一經擒獲到案卽應迅速審明將爲首者立時凌遲其同惡相濟之黨亦卽應斬決必須多辦數人俾眾共知儆戒不得僅照常例區別首從稍存姑息但止可就在事人犯從重究辦不得有心輕縱亦不得節外株連徐績等並宜將要犯一面正法一面奏聞不可監繫滋事又據奏堂邑張四孤莊放火傷人一案已據該州協等拏獲犯二十九名犯婦二口均交堂邑縣收禁等語所辦殊未妥協此等奸民旣經拏獲卽應嚴解省城聽候查審堂邑正當匪犯滋事之時豈宜復將其黨與解回萬一別有搶奪情節成何事體此時徐績見

赴壽張剿擒逆犯所有堂邑已獲之案自應卽令國泰由彼馳往
研審明確將應正法者一面卽行辦理一面奏聞其餘應行問罪
者俱選派妥幹員弁嚴行押解省城監禁毋仍留於堂邑方安再
壽張逆犯均係肥城而入其爲附近奸匪可知卽各犯姓名居址
亦無難蹤迹而得若徐績到壽張立即攻開城門拏獲各犯固爲
最善設或略有耽延則應選派勇幹兵役將各犯家屬先收捕解
省嚴密監禁俟全案辦結時分別緣坐定罪且使各犯聞知其家
屬已獲心中驚懼自更易於就擒至該撫同該鎮帶往之兵自必
不少應將壽張城密行圍住恐該犯情急有跳城脫逃等事立即
掩捕勿使一名漏網該撫務須妥速辦理仍卽據實覆奏將此由
六百里加緊傳諭知之○諭據姚立德查勘潘家屯引黃助湖情
形繪圖貼說具奏披覽已悉微湖水不敷用近處無可挹注勢不

得不別爲籌議潘家屯形勢既可借資引助亦屬權宜之法但開
挖引河關係重大高晉等見在漫工堵築自不能前往相度因思
何煥於江南河道情形最爲熟悉且見在豫省秋汛已過又值年
穀順成並無需辦之事著卽就近前往徐州將豐碭廳屬之黃河
北岸潘家屯河形會同姚立德悉心勘度如所議果屬可行卽一
面奏聞一面辦理至姚立德另摺所奏因壽張奸民聚眾一案前
往會辦等語轉可不必見在徐續已同惟一帶兵馳往擒捕逆犯
其事易於辦理毋庸姚立德復往幫助著該總河迅速馳赴徐州
與何煥公同將潘家屯引河籌勘妥辦卽行奏覆又同日伊齡阿
奏淮安一帶被水衝刷情形據稱關署內水至九尺其餘民居淹
沒且恐不無傷損而高晉等自初次奏報後尙未接有續奏想欲
俟辦理略有頭緒再行奏聞但淮安被災情形較重而漫口至七

十餘丈經理亦殊不易高晉在彼督辦固屬妥協但漫工過大得人商辦自更迅速何燭在河南年久於堵築機宜最爲諳悉且或需豫省協濟料物何燭在彼檄催呼應尤便著何燭於勘辦潘家屯引河後卽馳赴老壩口工所與高晉吳嗣爵會同速辦仍將見在情形若何約計何時可以合龍之處迅卽覆奏以慰廑念何燭接奉此旨卽星速起程前赴江南其河南巡撫印務卽交榮柱暫行護理所有該省武閣事務亦卽著榮柱代辦將此由六百里發往傳與何燭姚立德遵照並諭令高晉吳嗣爵知之○丁巳諭吳壇於採聽記載一事實不意其竟至於此但念其辦理刑名尙爲練習若竟予廢棄未免可惜吳壇著加恩以刑部主事用仍帶革職留任八年無過方准開復○諭軍機大臣等阿桂等奏攻打遜克爾宗賊寨設法進攻情形一摺已於摺內批示據稱海蘭察額

森特等所帶官兵直至賊碉之下或攜帶木梯扳上寨牆或拆開缺口往內衝進又從坍缺砌牆上乘之而入並將碉內之梯用力拔出以斷賊人上下等語雖賊於地窖深藏未能攻得而官兵如此奮勇實屬可嘉此等出力者係屬何人阿桂等俱應查明或卽行量予獎賞或記名一併優敘俾眾兵益知鼓勵至所稱恐官兵或有損傷卽令徐徐撤下所辦甚是大功將成諸事倍宜慎重見在官兵勇銳倍常礮力亦甚威猛自可剋期攻克惟當相機而進以期萬全又據稱十九至二十二雨雪連綿實覺可恨阿桂於二十三晴霽之後卽於是夜派兵進攻可見阿桂等及諸將領亦不肯稍懈看來番地氣候春秋雨雪每甚惟冬令晴日較多章嘉呼圖克圖曾言及之前歲攻得美諾等處及昨歲收復小金川皆係冬月成功已可槩見阿桂等尤當努力爲之若於長至前集勦

藏事亦不爲遲也至另摺奏賊人於十七日將七圖安堵爾送出
卽同緯窩斯甲一併拘拏訊供等語七圖安堵爾降順索諾木爲
之出力意賊酋未必真心擒獻今竟將其獻出賊情之窘迫可知
但據七圖安堵爾供稱聽見大頭人說如今格魯瓦覺宜喜兩路
官兵打得狠緊怕我們攔不住從前大兵進來原爲小金川土司
今將僧格桑屍身及其妾側累並大頭人七圖安堵爾等送出想
來可以完事緯窩斯甲布布拉克底巴旺三雜谷如今雖打得利害
但都是我們親戚若是大兵出去過幾年還可相好等語賊人狡
黠可恨在此而其糊塗不知死活亦在此今官兵攻勦金川所有
險隘已得十之八九阿桂等及諸將領自無不思速建鴻勳慰朕
懸注諒斷不肯因賊酋懇求稍存游移姑息之見第恐綠營官兵
悉皆膚識淺見且從征略久急圖休息者多一聞賊酋獻屍求降

之言難保其心不爲稍惑阿桂等當通行詳諭眾官兵等以各路大軍乘勝深入自可直薄賊巢指日成功爾等俱可仰邀優敘得官受賞況國家費如許力量以期永靖邊圉豈可虧於一簣若此時准其求降完事則禍根不除仍貽後患且賊酋等明言大兵出去過幾年與各土司還可相好則其野性難馴更覺顯然若不徹底妥辦則大兵一撤數年後賊人故智復萌又將聯絡諸番強吞弱併抗逆鴟張勢不能再興師問罪仍須爾等宣力戎行與其數年之後重勞跋涉何如就將成之績勉力圖功速膺懋賞乎如此明白告誡眾官兵當益加鼓舞自效不爲浮言所惑矣又據七圖安堵爾供土司今春因百姓沒得喫也借出一兩背米如今莊家收了土司們就要追還又要他們利息所以百姓們心腸愈淡等語又緯窩斯甲供土司恐百姓們心變叫齊各處寨首說大兵

打破了地方不論土司頭人與百姓都不饒的須大家出力看守地方等語可見金川番眾其心未嘗不動前曾諭令阿桂於進兵攻剿時一面傳布號令通諭諸番使皆知悉如有深知順逆之理不爲賊酋死守望風投降者仍得免死安居但不可仍令其居住本地若能並將土司頭人擒獻者必加重賞儻迷而不悟直待攻破碉卡雖降亦不饒恕此時以此傳播正當其可且因賊酋有了甯百姓之言切爲曉諭更屬將計就計易於引動著阿桂明亮共知此意於攻剿賊碉時令土兵等一體傳告使眾番共有見聞俾懈其死守之心各懷求生之念亦因勢利導之一法也再閱阿桂進到圖內密里阿岳以下官兵木城已過遜克爾宗之前而所得之格魯瓦覺亦在遜克爾宗之前是賊人來路無難截斷已於圖內用硃筆圈誌若從官兵木城至當噶克一帶圈誌處所堵截其

往來之路遜克爾宗賊眾自斷不能久存著將此圖發與阿桂若
此旨到時尙未攻得阿桂務當悉心妥酌爲之○命舒赫德赴江
南同高晉堵築漫口○禁京城商民囤積米穀○戊午 上駐蹕
避暑山莊○諭軍機大臣等壽張堂邑奸民滋擾不法不可不迅
速勦捕但恐該省綠營兵庸懦無能且與奸民等或瞻顧鄉情不
肯出力而徐績於軍旅素所未嫻恐不能深合機宜及早集事昨
降旨令舒赫德馳往河南督視漫工今思舒赫德久諳軍務著卽
由天津一路前往山東舒赫德過天津時卽密告總兵永昌豫選
該鎮綠營兵一二千聽候調用又滄州駐防滿兵亦可密告該城
守尉酌選數百備調又青州駐防滿兵或可密檄該副都統豫選
數百備調舒赫德行次德州時探聽壽張之事如徐績已經獲犯
結案舒赫德卽可徑赴河南辦理隄工若徐績尙未辦完舒赫德

卽先帶德州駐防滿兵數百星馳前往出其不意自可迅速撲滅如兵力稍覺不敷舒赫德卽酌量情形應調何處豫備兵若干由驛急郵檄調舒赫德於調兵諸事當有印信爲憑起程時可帶欽差大臣關防前往備用俟剿賊之事辦畢舒赫德卽由彼前赴河南董視漫口堵築情形尅期督促合龍以副軫念又諭據徐績姚立德奏逆賊肆擾見在剿捕情形稱逆匪首犯王倫係壽張人本屬白蓮邪教煽惑愚民擅敢劫掠壽張堂邑陽穀三縣殺害官員劫掠庫銀徐績等見駐東昌總匯之地分調官兵四面截剿等語此等邪教匪徒輒敢煽誘鴟張實爲可惡但侵擾一處卽棄城而逸究屬烏合之眾不難卽日擒拏正法第思東昌一帶與河南直隸俱屬接壤恐賊眾見官兵剿捕窘迫或致竄入豫直二境潛匿甚或轉爲滋擾更屬不成事體著周元理何燭各於毗連東省地

方一體嚴飭文武安密巡防如遇此等賊匪遁竄到彼卽督同悉力邀截擒拏昨會諭何燭前赴江南潘家屯與姚立德會勘引黃入湖事畢卽順道赴老壩口協同堵禦漫口今東省壽張等處既有此案其事更爲緊要且姚立德此時亦駐東昌防守會勦其潘家屯工程原非甚急卽老壩口漫工亦據高晉等奏近日水勢已緩易於辦理是何燭可不必亟亟前赴南河其應需料物仍遵前旨備齊聽南河調取時速卽撥往以濟要工統俟東省捕賊事竣再往江南勘辦並諭徐績如賊匪勦平全數就獲卽行知照直隸河南二省毋稍舛誤將此由六百里加緊傳諭周元理何燭並徐績知之仍各將如何巡防堵剿情形迅速覆奏○庚申命額駙拉旺多爾濟左都御史阿思哈帶侍衛章京及健銳火器二營兵往山東會剿王倫○辛酉命高晉往徐州堵剿賊匪薩載會同吳嗣

督堵築老壩口隄工○壬戌 上恭送 皇太后自避暑山莊回

鑾○癸亥以天津府屬七縣旱命撥通倉米十萬石備賑○甲子

諭軍機大臣等書張縣奸民聚眾滋擾一案節經徐績具奏止言

官兵追剿及賊匪大槩情形而不言賊人見在何處前日國泰奏

稱聞賊在臨清城南柳林地方今日閱城守尉格圖肯初七所奏

之摺亦稱賊屯聚柳林而徐績屢次摺來並不言及賊人實在踞

集之地卽所奏初七日打仗情形亦言探知賊匪屯聚柳林莊卽

提兵趕赴黎明行至小鄧家莊遠聞喊聲卽與賊遇剿殺百十人

復追至張四孤莊又與賊遇亦剿殺百餘人仍帶兵追趕賊人於

所至樹林茂密處放火阻擋又向前擒拏賊卽拒敵並不畏懼槍

礮兩腋蜂擁而來將徐績圍住惟一督兵從旁策應與徐績衝殺

斃戮多人各等語續據奏賊於初七夜往攻臨清州城經官兵用

槍礮擊斃三百餘賊並經縋城殲擒及追殺者又數十人賊眾經此一番創鉅似應略知怖畏此後賊往何處屯聚並未據徐績奏聞臨清附近地面俱係平陽賊眾幾及千餘且攜有眷車輜重如何藏匿且賊自二十八滋事以來距今已半月賊眾聚至千餘攜有眷屬每日如何餬口其拉車馬牛又如何秣飼或係入教之人隨處供給或賊匪於所過村莊肆行搶掠未據言明再賊匪攜眷而行夜間如何住宿或占踞村落或眾皆露處無難訪察而得何以亦未據奏及又如柳林莊小鄧家莊張四孤莊相距之路幾何係何州縣所屬坐落何方距所住若干里俱未據詳晰聲敘殊難明曉著姚立德徐績卽速查明據實具奏正欲傳旨詢問適徐績十一日所奏之摺於賊人蹤迹仍未敘明據稱鎮臣惟一中軍海明與德州城守尉格圖肯俱領兵駐紮近城之處是見在官兵聲

勢亦復不小何以賊眾尙能屯聚臨清城外究竟官兵營盤距賊所屯處遠近如何並著姚立德徐績一併明晰覆奏至所稱賊眾每日明攻臨清暗窺東昌等語此言出自何賊所供殊未必然恐係無能緣旗將弁臆度之語今惟一格圖肯海明俱在臨清兵勢頗盛豈尙不能截住賊人去路何至容其窺伺東昌果能如法妥辦不應慮及於此又據稱逆匪於臨清閘上搭橋過渡致回空糧船不敢行走多有在臨清以北者並糧船短絛亦被迫脅隨行殊屬不成事體臨清閘口爲南北水程要津豈容賊匪屯占應卽揀選得力兵眾令惟一統領將閘口之賊先行剿清使糧艘可以安心按幫南下最爲緊要此亦急則治標之一法也至所稱密派精細弁兵假裝運草民船燒其閘口橋木所籌甚好不知曾燒毀否卽速奏聞又據稱賊人車輛甚多自皆係賊眾眷口輜重何不

俟其夜間屯聚時亦用火攻之法姚立德徐績當與惟一妥酌行之如果山東綠營實不足恃且恐其中卽有通賊之人而青州德州兩處駐防兵爲數亦不甚多此時轉不必輕舉妄動莫若俟舒赫德到後會同妥酌辦理至所稱革職副將王普曉暢軍務頗得兵心已令其同海明帶兵前往等語王普雖係高雲從供出之人其情節尙未甚明見交英廉將高雲龍訊究明確另爲覈定該撫旣欲其帶兵恐無頂帶之人難以統率士卒著加恩賞給參將銜視其出力若何事成之後再行酌量降旨將此由六百里加緊傳諭姚立德徐績知之○丙寅 上自避暑山莊回鑾○丁卯舒赫德奏兗州鎮惟一德州城守尉格圖肯與賊接仗情形諭軍機大臣等惟一格圖肯俱係領兵大員自應勇往殺賊卽或賊稍猖獗官兵不能取勝亦當整隊進臨新城與在城文武協力堅守雖

退入新城亦不能無過然向後若能奮勉猶可以功相抵乃惟一
格圖肯一經兵挫竟爾退往東昌實出情理之外臨陣退避爲國
法所不宥惟一雖係五福之子格圖肯雖係宗室而既經干犯軍
紀若復曲爲寬貸則此時進剿何以勵眾將來命討何以用人前
此惟一救援徐績著有微勞朕卽賞戴花翎有功旣賞有罪又豈
可不誅著舒赫德侯京兵到齊拉旺多爾濟阿思哈徐績等會集
臨清於定期進剿之前一日傳朕此旨將惟一格圖肯革職鞫問
當眾訊以爾等與賊接戰時卽有失利亦應退保新城縱兵力果
單猝不能守甚至臨陣捐軀身先授命不但躬膺卹典爾子孫亦
蒙襲廕何等光榮歷來軍營陣亡恩例爾等甯有不知何至甘心
退縮貽笑於人此時自蹈憲典爾等復有何辨如此傳旨訊問錄
取供詞奏聞一面卽將伊二人在彼正法示眾其兗州鎮總兵員

缺緊要一時不能得人見有防守臨清之副將葉信保城殺賊似屬能事已降旨升銜一等侯事竣酌量錄用若其人能勝兗鎮之任舒赫德卽行奏請補授又德州駐防兵內跑回者八十餘名此雖非京城勁旅可比亦不應不顧顏面若此著舒赫德查明首先倡逃之人卽行正法餘發烏嚕木齊充當苦差至德州駐防兵經格圖肯帶往者共二百五十名今跑回者僅八十餘此外有打仗時陣亡及傷重者當查明照例卹賞儻有因交鋒挫衄四散奔潰者卽應照逃兵之例於拏獲處所正法其惟一所帶之兵亦當照此查明辦理又村民既有自賊中逃回者可見百姓非盡昧天良徐績等當迎機化導徧行曉諭使其審擇禍福各知猛省復爲良民至賊人驅迫愚民在前攬受官兵槍礮其情實爲可恨舒赫德等於進剿打仗時當令人揚聲傳示使百姓卽速避開聽我兵用

槍礮擊賊若復迷而不悟我健銳營鳥槍從無虛發羈擊所及玉石俱焚毋自貽戚如此剴切宣諭必當感激聽命○己巳諭周元理飭有司毋許攔阻貧民出口覓食○壬申 上奉 皇太后回京師○癸酉諭嗣後十五善射缺惟將拜唐阿兵丁及各旗閒散宗室引見挑取至王公大臣侍衛官員內步箭嫻熟者於上三旗內每旗另添設十五缺將下旗內王公大臣侍衛官員一併引見挑取著爲例○甲戌諭據周元理昨奏直隸官兵在臨清河西堵剿賊匪賊眾三千餘猝至擾擊我兵營盤用槍礮羈擊雖斃賊甚多然尙在相持未散茲復據奏接仗時有騎馬賊目腰插紅旗手執白蠟桿槍直奔我營經遊擊武靈阿射中左肩賊拔箭復衝經兵丁穆維放槍打中右骹墜馬穆維卽割首級其馬鬃繫有紅紬上寫楊壘詢之所捉活口云係賊總兵偽號又打死騎驃執劍一

賊騎馬執紅旗一賊將至酉刻賊尙堅力抗拒瑪爾清阿又率兵
砍殺十餘賊其眾始奔回賊巢不敢復出等語此次堵殺賊匪使
其不能西逸將領弁兵俱奮勇出力甚爲可嘉瑪爾清阿著遇有
總兵缺出題奏升用武靈阿著交部遇有參將缺出卽行升補兵
丁穆維著交該督遇有千總缺出卽行拔補其在事出力兵丁著
周元理查明酌量獎賞以示鼓勵該督周元理調度督率有方並
著交部議敘○以陳用敷爲廣東按察使由雷瓊道遷○丙子大學士
舒赫德等奏二十二日接周元理札知賊擾河西直境營盤臣等
統兵遄行二十三日抵臨清賊於舊城外聚集迎拒臣阿思哈徐
績帶兵掩擊賊竄入城伊琳伍什布帶兵衝入焚燒房屋將賊趕
往西北城隅村內臣舒赫德拉旺多爾濟早赴舊城會合援捕計
斃賊數百人拏獲活口百餘人各處村民紛紛擒賊呈獻臣等未

到之先賊匪豫行逃竄者約一二千人至賊首王倫並餘匪千數經臣等將擒賊嚴訊據云在舊城藏匿二十四日伊琳等帶兵入城尋拏正犯拉旺多爾濟前往四處村莊搜殺逃賊不使稍留餘孽諭軍機大臣等賊首賊黨及其家口等既據見獲賊眾供稱俱在舊城內藏匿自必無從外軼不難竭力搜捕所有逆首王倫並濟惡之梵和尚堂邑村民王經隆及賊中所稱元帥孟姓尤爲巨賊必須立就擒獲其姚立德奏到各供內有名要犯亦當盡數成擒舒赫德卽擇其中罪惡最重之犯如王倫梵和尚王經隆等數人嚴行檻城派乾清門侍衛管押解京嚴行碎礮以伸國法而快人心其餘卽於彼處正法示眾又姚立德等奏審辦拏獲各犯訊明被脅隨行應釋放者十人周元理亦奏將拏獲之周振樂等三名審係鄉愚被脅業經宣諭釋放所辦俱未允協百姓或庸懦無

能爲賊人驅迫而行原不能盡責以大義如係一時畏死過後卽赴地方官投首或遇見大軍卽釋仗跪求者自當在脅從罔治之列若旣隨賊抗拒官兵敢於接仗卽與賊無異及被獲誑稱逼脅豈可復爲輕宥此等甘心從賊並非善良其中豈無與王倫相類者若復容倖免將來藉端嘯聚恐其勢更盛並不能如此時之易辦是縱賊復以養賊實爲非計何如就見在兵力辦理肅清俾嗣後悚然不敢復犯乎總之臨陣被獲之犯斷不可稍爲姑息必當盡行駢誅卽係徒手隨行並無抗拒實蹟者亦當分別發往伊犁煙瘴不宜復留內地或緣營兵卒無用不能於陣上拏獲真賊妄以避賊奔逃平民誣拏指賊一經訊明又當治以誣陷之罪不宜稍有模稜尤不可輕爲開脫圖積陰功也周元理所釋之周振樂周振德陳珮三犯著再拘回確審並著交舒赫德妥協辦理至村

民紛紛有擒賊呈獻者此等實係良民自應予以獎賞良善則賞之奸宄則除之惟視其人之自取朕實無所容心舒赫德等均當深體朕意至臨清新城衙署倉庫所有守衛理所宜然其舊城獨非臨清之城乎何以不爲保禦守新城固屬有功其不守舊城豈能無過卽云功過相抵亦必據實聲明候朕覈其輕重量予從寬斷不可顛預了事再舊城頗爲富庶何以無文武員弁駐守並著舒赫德查明具奏其舊城內居民鋪戶當賊至時或力爲抵拒或潛行避逃方爲正理何與賊相溷而處此等亦當查明分別妥辦示以懲儆又昨據杜安邦稱壽張城內被賊擄害時死者甚多並有不肯從賊自盡者果爾甚可矜憫應查明量行予卹其堂邑從教迎賊之男婦百餘則必當確查均行正法勿稍寬宥至白蓮教傳誘之處尤須逐一清查妥辦勿使復貽後患○命高晉仍同老

壩口堵築隄工○丁丑舒赫德等奏連日剿賊逾千王倫及有名頭目尙未就擒嚴訊獲犯據供王倫住城中汪姓大宅伊琳等赴該處擒拏賊人踞屋死守放火焚燒並無一人竄出王倫是否在內尙不能知又將續獲各犯細訊則稱王倫住一大當舖內復添兵赴該處燒屋擒拏見有眾匪環護一賊用槍擊斃獲匪認識云係王倫之弟又在城按勦時有一賊從屋頂跳下用刀扎入經官兵槍斃認係陽穀縣人楊五賊中稱朴刀元帥卽碎礫示眾又有披髮騎馬手舞雙刀之婦人向官兵直撲卽經槍斃認係無生聖母爲王倫倚仗之人頗有邪術賊眾所存有限踞守堅壁中與王倫爲苟延殘喘之計今王倫之弟旣於該處擊斃該匪自亦在內仍督兵併力焚攻諭軍機大臣等王倫罪大惡極必當明正刑誅以彰國法若斃於槍箭之下或焚死或自戕得免魚鱗碎礫尙覺

其倖逃重罪不足以大快人心然亦必確有證據毫無疑竇否則未便輕爲此言因思舒赫德等昨奏賊人於官兵未到之前豫逃者約一二千人安知王倫不濶入其內故留賊黨在舊城抗拒官兵詭爲賊首未動之狀而潛已同眾竄逃亦事理所或有該處見獲賊犯內必有賊黨中切要之人及其有名賊目自應嚴刑根究逆首實在蹤迹務卽成擒解京伏法豈可稍涉顧預若辦理稍不切實萬一該犯未死竄入他處數年後又復糾眾滋擾則辦理必較此時更難益復不成事體此事所關甚大從前班滾一案慶復李質粹成例具在此乃舒赫德經手所辦之事知之最悉豈容或忘乎至槍斃王倫之弟既有認識者應詳訊其實係何名其弟兄尙存幾人又所斃舞刀女賊係王倫何人因何同在教內眾逆既稱爲無生聖母又言其頗有邪術亦應訊問識認之人究竟係何

邪術賊黨中類此者尙有何人又所殪楊五一犯賊旣稱爲朴刀元帥自係稍有技力如此類者共有幾人亦須嚴究明確拏獲重處勿使一人漏網又與王倫同惡相濟之梵和尚王經隆及孟姓賊目俱稱元帥且在首逆左右不離者尤爲要賊何以官兵圍住汪姓大宅及當鋪勦殺時並不見此數賊露面是否在内潛匿未出或溜入一二十人中豫行遁逃俱不可不詳晰確查妥辦至所稱王倫之弟旣在大當鋪擊斃該匪自亦在内等語究係揣度之詞不足爲據必須嚴訊活口取有確供庶可憑以緝捕然亦須察其情僞慎重辦之不可爲黠賊狡供所惑也至從舊城豫逃之一二千賊須有著落昨拉旺多爾濟帶兵往村莊接拏逸賊是否卽係此項曾經拏獲幾人何以昨甫出外接賊今卽回至營內聯銜如此恩恩往返恐未得有實濟再拉旺多爾濟前往捕賊何以阿

思哈不與同行拉旺多爾濟騎射嫺習殺賊勇往固屬所長但其年紀尙輕事未閱歷遇有籌度賊情之處自不及阿思哈之練達朕派阿思哈與拉旺多爾濟同往原因其久任封疆見事較有主見可以助拉旺多爾濟所不及况見在山東剿捕賊匪之事固專責之舒赫德其次卽阿思哈豈可於追拏賊眾要務不同拉旺多爾濟前往究竟拉旺多爾濟搜捕之賊曾獲若干其一二千人尙餘若干均不可不覈其實在數目舒赫德卽確查奏覆並令阿思哈明白回奏若此豫逃之一二千人卽春甯音濟圖等在塔灣所截之賊則據稱三次剿殺共賊五六百人又率善射手追擊五六十里射殺百餘人通計不過六七百尙有一千三百餘賊歸何處見據楊景素奏官兵在西岸堵截見有浮水而逸之賊或用槍打箭射鈎搭生擒所獲甚眾等語似卽在此一千三百數內但就獲

幾何諒亦不過十分之一其餘又皆何往斷不可不按數覈明勿使一名落空亦勿使一名得脫並當計其去路各處分堵近而直隸河南遠而江南所有與山東接壤之處均當一體防截勿使竄逸高晉周元理何炯各宜實力妥辦毋得稍有懈怠至楊景素處所拏浮水之賊據奏已解周元理審究此等匪犯浮水逃命其爲賊黨無疑必無良民肯隨賊遁竄之理周元理應審明從重究治不可稍存姑息至當舖爲賊人居住且鋪內什物俱爲賊分給眾人而汪姓大宅並令賊踞爲巢穴均不可不分晰查辦當舖財物若係鋪內商夥供賊用度並讓鋪屋與賊居住卽屬賊黨均不可不置之於死其大宅汪姓自卽前日杜安邦所供汪鄉紳者其人爲誰是否出仕在外抑安住在家或其先世有仕宦者相沿稱之舒赫德等卽速查明具奏若當舖大宅俱被賊搶占將此鋪住屋

之人戕害或行羈禁自當分別矜免若賊將鋪店之人驅出而其
人從賊隱忍不能赴官稟首者雖無重罪亦當予以懲治其餘居
民店戶均當一律查明分別辦理舒赫德爲朕信任大臣因令專
辦此事當以朕心爲心慎之又慎不可稍自貽誤卽拏賊事畢亦
應查辦賊所經行之城邑村莊分別撫綏懲創之事並清查邪教
來蹤去迹以淨根株方可回京復命勿急於完事稍致草率也○
戊寅嚴定州縣官失察訟師處分

冬十月辛巳朔諭山東奸民王倫王聖如等糾眾不法一案其滋
擾壽張等處雖事起倉卒而倡行白蓮邪教煽誘多人已自今春
始非一二日也徐績身爲巡撫地方是其職守乃於邪教惑眾之
犯平時置若罔聞釀成事變及逆犯連擾三縣劫庫戕官徐績心
存畏懼毫無措置及統兵捕賊被賊圍於臨清城南若非惟一領

兵救援幾致爲賊所害又復成何事體似此庸懦無能本應罷斥治罪但奸民敢作不靖若因此罷一巡撫恐長奸民之智是以仍留徐績在任冀其奮勉自效然料其事斷非徐績及緣營無用兵丁所能辦因派滿洲勁旅前往並令大學士舒赫德往彼調度舒赫德至臨清舊城督率將士奮勇剿捕賊黨其最要黨犯如王聖如孟璩和尙梵偉王倫之弟王樸及有名賊目之閻吉仁吳清林李旺等俱已就擒雖據供王倫在樓自焚而舒赫德以賊供不足憑信見仍派兵儘力接緝逆賊若實未死自難以潛蹤但京兵未至臨清之前卽有賊一二千豫行逃竄雖音濟圖截殺五六百追殺百餘又經楊景素在河西堵截槍殲箭斃計二百餘生擒百餘人通計未獲之賊尙有千餘見在逃往何處必須切實根追務獲實在下落方能完事阿思哈在彼未同拉旺多爾濟前往各村接

捉逸賊致賊零星竄匿阿思哈不能辭咎然較徐績尙輕若徐績以本省巡撫剿擊逆賊尤其專責當賊正窮竄之時理應帶兵追捕思贖前愆至舊城督兵剿賊之事有舒赫德董辦已屬裕如徐績實無可稍效之處乃安坐臨清竟忘拏賊係伊分內之事此一節實不和封疆之寄朕亦不能再爲之姑容矣又據舒赫德奏審訊賊黨孟燦等起事之由據供因年歲歉收地方官妄行額外加徵以致激變等語賊供本不足據此必逆匪等自揣叛逆罪重捏造此言冀其解免且其說流傳四布以致無知之李漱芳撫拾入告妄云奸民聚眾滋事由饑寒所迫獨不思朕臨御三十九年遇有水旱偏災不惜帑金蠲賑並酌予緩帶俾紓民力若雨暘稍有不時必多方詢問以通民隱何至有窮黎無告之事卽或一州一縣諱飾災傷原可赴該上司呈籲或上司仍置不辦並可赴京於

部院衙門控訴何患壘不上聞今既爲叛逆亂民卽果饑寒所迫亦難輕減況其說造自賊口本屬飾其反蹤李漱芳奈何不察情理轉爲亂民設說尙可謂之人類乎前日有壽張縣捐納吏目杜安邦被賊掠去後從賊中脫出來京命軍機大臣詢其壽張年饑情形據稱收成實有對半各處俱有蓋藏並非荒歉該縣民人亦無曾經告災之事王倫等實係白蓮邪教等語其原委大槩可知此係令李漱芳在旁觀看者其誑易明至所云額外加徵之語則無論年歲豐歉皆不應有朕屢飭督撫等實心察吏若劣員果有額外加徵之事徐績徇匿不辦卽當重治其罪尤難輕恕朕以愛民爲念卽其說本無稽既有所聞亦不可不徹底查究至歉收加派均無難逐一稽考著舒赫德卽同新任巡撫楊景素詳晰確查據實覆奏徐績若仍爲巡撫恐該省吏民畏懼觀望難得實情徐

績著解任交與舒赫德差遣效力候查明奏聞定奪再降諭旨山東巡撫員缺卽著楊景素補授楊景素不必來京請訓卽在彼隨舒赫德查辦歉收加派虛實並實力搜捕逸賊毋任一人漏網其直隸布政使員缺著單功擢補授清河道員缺著沈鳴皋調補至李漱芳於壽張奸民一事外並稱聞得近京一帶亦有饑民扶老攜幼遷徙逃亡地方官著人於盧溝橋攔住不令過橋北上之語彼時卽會查詢並無其事且此等貧民多有紛紛出口覓親就食者若盧溝橋果有攔阻之事伊等何由得出古北口况前日周元理奏辦偏災賑借之事諭撥通倉米十萬石備用是直隸地方並未匿災也乃范宜賓復踵其說謂黃村東壩盧溝橋等處窮民挈眷覓食者甚多皆因橋上不令放過以致散處乞食等語果爾殊不成事而周元理亦當有罪矣因特派侍郎高樸袁守侗帶同范

宜賓李漱芳前往各處查看據覆奏並未見一乞食流民該御史等所言全無憑據詰之李漱芳范宜賓惟稱原屬風聞等語科道風聞言事原所不禁但既聞之後亦須覆加體訪得實再行入告豈可肆意妄言范宜賓妄請加廠專爲沽名取悅之事已屬不堪而李漱芳之代奸民解說其心術尤不可問本應各治其罪但念其所言關繫民事朕豈肯以此責備言官轉令無識之徒藉爲口實設各省遇有水旱督撫諱災而言官又不以告則所繫者甚大朕不肯爲也范宜賓李漱芳摺俱著發還將此通諭中外知之○諭軍機大臣等首犯王倫無實在下落雖訊據王經隆供有會勸王倫不肯下樓及王峻愛供王倫尙死守樓上等語賊匪狡詐百出所供實不足憑舒赫德不肯含糊完事深得大臣實心任事之道至所稱王倫眷族義子及小頭目等頗多等語王倫母妻是否

在內應行查明具奏其義子及小頭目等情罪均屬重大當詳加嚴訊應解者卽委員妥速押解其餘卽於地方處決至國泰所奏高唐州獲賊王四供係王經隆之子二十五日在臨清打仗逃走可見臨清尙有逸出之賊不可不及早搜捕致留餘孽楊景素已補授山東巡撫其辦事自勝於徐績所有善後事宜及應行查辦之事卽著隨同妥協辦理至直隸河南見有周元理何燭帶兵防截且據楊景素屢次所奏賊匪並無過河之人是羣賊竄匿止在山東境內楊景素務當設法儘力搜捕毋任逸賊一名漏網以副朕委任至意○壬午諭明季山東徐鴻儒與白蓮教擾害城邑居民蔓延至二十年之久今王倫之亂經朕發京兵命舒赫德往剿彌月卽將羣賊盡行殄滅舒赫德本當議敘但王倫罪大惡極不能生擒伏法致令焚樓自斃倖逃寸磔之誅不足以快人心而申

國法舒赫德以調度無能自陳請罪固可不必然伊辦理實有不能盡善者卽如音濟圖訪知王倫實在住處欲往擒拏彼時舒赫德自應遣派勇幹百人同往乃竟聽其帶人無多輕率前往致逆犯於被擒就獲之時匪黨從兩廂突出向尊音濟圖猝不及備同鄉阿爾圖等八人均各受傷復爲逆犯搶去音濟圖等奮勇出力業已施恩擢賞而舒赫德不能豫派多人往捕實屬疏略又如遊擊剛塔見王倫在汪宅小樓正坐忽然樓屋火起被焚王倫亦斃其內雖訊取眾犯供詞證驗尙有可據而所辦實未周詳在初時緝拏賊匪或遇賊眾死守人力難施固非火攻不可及賊勢窮蹙匿迹偷生原當豫防其畏罪自焚之事舊城瀕臨運河取水甚便若備有激桶麻搭撲滅亦非所難卽見賊已放火亦可遣善緣者攀登撲救弗使逆賊得自投烈焰舒赫德非不經練諸務者何竟

見不及此舒赫德於此等節目實不能辭咎念其已將同案逆賊王聖如及逆黨孟璩楚偉等七犯俱已擒獲姑從寬免其交部仍著傳旨申飭所有王聖如等各要犯俟解到日審明嚴辦再降諭旨將此通諭中外知之○以瑯古泰爲內閣學士額外內閣學士阿肅爲

左副都御史

由光祿寺卿遷

○江南老壩口隄工合龍○壬辰免臨清新

城本年未完額賦並舊城未完額賦十分之五○癸巳諭逆賊王倫滋擾壽張等三縣殺害縣官實爲罪大惡極其壽張堂邑兩縣知縣見訊解京各賊犯據供該二縣俱被賊縛逼其順從皆罵賊不屈爲賊戕害等語壽張縣知縣沈齊義堂邑縣知縣陳枚俱罵賊而死克全臣節深合守土之義甚屬可憫至沈齊義未能先事覺察及訪拏時又復機事不密致賊黨聞風生變雖亦不能辭咎而旣以身殉亦可相原沈齊義陳枚俱著加恩照陣亡例議卹又

昨據楊景素奏堂邑縣訓導吳璵亦屬賊黨節並著該撫查明交部議卹尋議照例給與贈廕祭葬並予陽穀縣縣丞劉希薰典史方光祀莘縣把總楊兆立堂邑縣把總楊兆相廕卹俱入祀昭忠祠從之○諭逆匪王倫等糾眾滋擾占踞臨清因東省緣管偏怯無能特選健銳火器二營兵一千名派額駙拉旺多爾濟都御史阿思哈帶領剿捕並令大學士舒赫德統率經理未浹旬而一舉蕺事逆黨要犯悉就殲擒伏法而賊首王倫亦畏罪自焚斃命驗有實據若非選派京兵前往安能迅速若此所有出力各兵及帶兵各員等業於起程時加恩賞賚其春甯音濟圖巴圖保等亦節經加恩賞擢至舒赫德調度有方拉旺多爾濟阿思哈均能實力董率甚屬可嘉舒赫德拉旺多爾濟阿思哈俱著交部從優議敘其協勦之直隸總督周元理總督管河南巡撫何燏正定鎮總兵

佑命重熙累洽同軌同文所謂禮樂百年而後興此其時也而

禮樂之興必藉崇儒重道以會其條貫儒與道匪文莫闡故予蒐四庫之書非徒博右文之名蓋如張子所云爲天地立心爲生民立道爲往聖繼絕學爲萬世開太平胥於是乎繫乃下明詔敕岳牧訪名山搜祕簡並出天祿之舊藏以及世家之獨弄於是浩如淵海委若邱山而總名之曰四庫全書蓋於古今數千年宇宙數萬里其間所有之書雖夥都不出四庫之目也乃掄大臣俾總司命翰林使分校雖督繼晷之勤仍予十年之暇夫不勤則玩日愒時有所不免而不予之暇則又恐欲速而或失之疏略魯魚亥豕因是而生語有之凡事豫則立書之成雖尙需時日而貯蓄之所

則不可不宿構宮禁之中不得其地爰於文華殿後建文淵閣以待之文淵閣之名始於勝朝今則無其處而內閣大學士之兼殿閣銜者尙存其名茲以貯書所爲名實適相副而文華殿居其前乃歲時經筵講學所必臨於此枕經藉史鏡己牖民後世子孫奉爲家法則予所以繼繩 祖考覺世之殷心化育民物返古之深意庶在是乎閣之制一如范氏天一閣而其詳則見於御園文淵閣之記○丙申諭軍機大臣等高晉奏勘辦潘家屯引黃助湖事宜一摺請倣照毛城鋪作法量爲收小於潘家屯建立碎石滾壩外築束水隄並鉗口草壩以爲重門關鍵於屯之東南米家莊開挖進黃引渠避溜倒勾不至有吸溜之虞等語所辦尙未甚妥此事姚立德奏以今年秋雨較少微湖存水未充別無來源因潘家屯舊有河形思欲引黃入湖以濟運朕以開挖引河關係甚重高

晉素嫺河務特令到彼勘度如該處引河果可開通目前卽能引
流分潤挹注微湖於明春漕運有裨自屬甚便然亦不過一時調
劑之權宜所謂急則治其標也如所云今冬開工興挑尙未能引
水入湖必俟桃汛水發始爲開放則施工急而其效甚緩况本年
偶因秋雨短少以致微湖蓄水無多或明春雨水調勻泉源永盛
原可助湖波以濟漕運又無庸復事遠求且分引黃流止暫濟目
前之急非毛城鋪爲徐城尾閘宣洩可比儻引河一開黃水經流
勢順或遇夏秋盛漲湍急湍流吸動大溜難於遏抑濱湖民田虛
舍恐不能無衝突之虞是其利小而患大不可不慎之於始今已
命姚立德前往該處會同勘辦可卽與高晉詳悉面商若姚立德
酌計微湖之水明春不至十分匱乏則又不宜爲此冒險之舉或
江南至山東一帶漕河有淤淺之處可趁冬令挑濬以利挽運者

較引黃流似爲妥便卽或略需工費諒亦不過三萬餘金若潘家屯開挖引河目下所費雖不過三萬餘金萬一將來稍有奪溜之事多費固不待言而貽患河防所關甚大不可不深思熟計著傳諭高晉姚立德卽速會商妥辦如以引河爲不應挑挖卽一面停工一面具奏將此由六百里傳諭知之仍將作何商辦緣由迅速覆奏○諭秋審情實人犯經十次未勾改入緩決著爲令○丁酉諭舒赫德此次辦理剿捕賊匪諸事實力宣勤調度妥協時值冬令天寒著賞給御用貂尾冠一頂黑狐馬褂一件由驛發往俾資御寒以昭優眷○庚子諭軍機大臣等據圖思德奏查參署保山縣知縣王錫虧空兵糧米穀一案據王錫呈出帳目內皆供應彰寶行署中一切用度及隨帶兵役轎夫戲子工匠等費自上年八月起至本年五月止約共用銀四萬餘兩等語實堪駭異該省自

前歲朱一深錢度之案大加創懲意必稍知儆惕不謂整飭未久復有此事殊出情理之外該撫李湖同在一省彰實狼藉若此豈竟毫無見聞何以並未奏及况彰實在永昌患病李湖曾往看視其於彰寶情性乖張勒索供應等事所見尤應親切何竟若罔聞知且圖思德到永昌未久即能查出彰寶種種情弊李湖在滇同事數年豈得謂未窺其影響耶李湖係朕加恩特用之員伊任直隸府道頗能認真辦事彼時如周元理裴宗錫等尙不免有隨和方觀承之處而李湖則似矯矯不羣者是以特加賞識浚陟兩司擢爲巡撫今於彰寶婪索款蹟竟至代爲徇隱並不據實奏聞豈有因地遠官高即如此改節實不類其平日所爲殊非朕委任之意著傳諭李湖即速據實明白回奏毋再稍有欺飾自速重戾○平故原任左都御史張泰開祭葬諡文恪○癸卯大學士管兩江

總督高晉等覆奏前查辦潘家屯引黃助湖事宜實因微湖蓄水甚少明春泉源旺盛與否難以豫定須藉黃水以資挹注至江南山東漕河淤淺處所每冬相度挑浚然止閒段疏治若將八閘以下河道挑深則上游之水一洩無餘與東省全局有礙若上下通行挑挖則所費甚大臣等遵旨公同覆查引黃助湖實爲有益無損且潘家屯原定徐城水誌消至六尺始行開放俾過水二尺入湖若徐城誌椿長至七尺以上卽行堵閉非若毛城鋪於大汛水長時開放分洩異漲可比且見擬倣毛城鋪作法建立碎石滾壩外築束水隄並鉗口草壩以爲重門關鍵若遇水長卽將引渠層層堵築不至吸動大溜得旨旣有益無損自當上緊興工○乙巳禮部等部議准江西按察歐陽永禱奏律載嫡子庶子爲庶母服齊衰杖期嫡子庶子之妻同庶祖母並無服制妾爲家長父母制

服期年於家長祖父母亦無服制恩義未周請嗣後嫡孫眾孫爲庶祖母照伯叔祖母例服小功五月妾爲家長之祖父母分誼雖懸恩義非遠查妻爲夫之祖父母例服大功九月有子之妾於家長之祖父母應令少殺服小功五月又稱嫡子眾子毆傷庶母與至死律有專條嫡孫眾孫於庶祖母並無干犯治罪之條請嗣後毆傷庶祖母者照毆傷庶母例減一等科斷至死者擬絞監候謀故殺者擬斬監候其中所犯情節或有不同統於秋審時酌量辦理若庶祖母毆死嫡孫眾孫者仍同凡論從之○命截留江蘇漕糧二十萬石於淮安備賑○丙午諭總督銜河南巡撫何燏老成練達誠篤恪勤於河道機宜素尤諳熟自簡任巡撫並管河務以來體國愛民實心經理而於一切修防捍禦董率有方實爲封疆得力大臣今秋因壽張逆匪滋事督兵在東省協勦事竣回豫時

偶爾感冒業已就痊昨聞於內黃途次復感風寒念其年逾七旬尤宜慎重調理因諭令卽在內黃暫爲頓息特派乾清門侍衛帶同太醫院堂官馳驛前往診視以冀速痊茲遽聞溘逝深爲悼惜著加贈太子太保入祀賢良祠所有應得卹典仍著該部察例具奏尋予祭葬諡恭惠○諭徐績在山東巡撫任內因逆匪王倫等滋擾一案辦理未能妥協特將伊解任令其緝捕逸犯勉圖自效並據舒赫德奏逆犯孟璟供詞有地方災歉官吏額外加徵釀成事釁之語若所供果確卽應將徐績重治其罪因諭令舒赫德楊景素等密訪嚴查茲據舒赫德查奏壽張年歲有收該縣亦無橫徵加派之事今日並據楊景素奏東省秋成通計八分有餘其非匪災可知是徐績之咎止在失察邪教尙非大過其平日辦事頗能甞勉著加恩補授河南巡撫並管提督仍革職留任俟八年無

過方准開復所有從前賞給孔雀翎亦不准戴用以示懲儆河南巡撫員缺緊要徐績卽速前往接辦其未到任之前巡撫印務著榮桂暫行護理○命各督撫行保甲法○頭等侍衛音濟圖以勦賊山東受傷病卒賞銀一百兩治喪○戊申諭海蘭察自革退參贊大臣後勦殺賊匪奪取碉卡甚屬奮勉可嘉額森特殺賊奪碉亦屬勉力海蘭察額森特俱著授爲參贊大臣額森特著卽在豐昇額隊內行走海蘭察卽在阿桂隊內行走彼處參贊大臣旣多伍岱著仍爲領隊大臣○諭阿桂等奏到攻得凱立葉下截山梁奪碉殺賊情形一摺據稱官兵連日設法攻勦遜克爾宗尙未得手探得日爾巴當噶榮噶爾博中間有墨格爾一處因於十六日戌刻抽派官兵分隊進發於林深礮陡之中不避冰雪爬越而登賊人抵死拒守海蘭察等奮力衝殺所帶之兵全上墨格爾山梁

額森特等隨亦上梁將碉卡三座上下合圍砍開碉門殺賊甚多餘俱滾崖落澗官兵直據日爾巴當葛西面突起高峰而海蘭察等又向西面密拉噶拉木山頭下攻壓並將該處石碉盡行攻克此次打仗共殺賊一百五六十名拏獲活口五名割取首級三十七顆連搶大碉寨房二百餘間斃一尊馬四匹牛羊槍矛甚多見距噶爾丹喇嘛寺十餘里前抵勒烏圖亦不過二十里等語此次將軍等用閒出奇制勝調度有方領隊大臣及在事弁兵均奮勉出力奪碉殲賊甚屬可嘉阿桂豐昇額色布騰巴勒珠爾俱著交部議敘海蘭察額森特尤爲超勇出羣已另降清字諭旨授爲參贊大臣仍著交部議敘其餘將領弁兵並著阿桂等查明咨部分別議敘獎賞以示鼓勵

十一月癸丑諭明亮等奏攻克日旁碉卡寨落殺賊甚多一摺據

稱周安官寨對面賊山卽係日旁分支有路可繞隨派和隆武等督兵密爲攀越並令奎林等各帶兵分兩翼並進和隆武於十九日四鼓領兵繞至日旁山後奮力搶碉殺賊將戰碉十餘座平碉二百餘間全行攻奪殲戮賊番滾崖落澗無一得脫者割獻首級三十餘顆活捉數人搶獲槍礮馬騾牛羊口糧等物甚多距阿桂軍營止隔一河直望勒烏圍約不過二十里等語覽奏欣悅此次明亮等探路籌畫均合機宜而越險攻碉殺賊全係和隆武功績伊父和起盡節捐軀應有是子深爲嘉慰另降清字諭旨將和隆武授爲都統示獎矣所有調度有方之將軍參贊及在事出力之將佐弁兵著明亮等查明卽行咨部議敘○諭凡有重罪應入情實人犯經二三年後始行就獲其本罪應絞監候者俱立決○甲寅諭大學士舒赫德辦理山東叛逆王倫一事雖不比平定外夷

逆匪而勦辦迅速甚屬奮勉可嘉舒赫德著授爲御前大臣賞戴
雙眼花翎仍賞給雲騎尉世職○乙卯諭阿桂自統兵進勦以來
實心調度諸事皆合機宜此次又將日爾巴當噶全行攻克接通
凱立葉指日卽擣勒烏圍賊巢甚屬可嘉著授爲御前大臣並賞
雙眼花翎用昭恩眷參贊海蘭察額森特屢戰奮勉超羣此次奪
殲賊亦屬出力海蘭察著在御前侍衛上行走額森特著在乾清
門行走頭等侍衛額爾特藍翎侍衛泰斐英阿於攻克默克爾山
梁時俱能奮勇額爾特著賞副都統職銜在乾清門行走泰斐英
阿著授爲三等侍衛○諭在屯居住旗人及各處莊頭並駐防之
無差使者其流徒罪名照民人一例實遣著爲例○丙辰諭富德
攻取德木特布咱納等處碉寨甚爲奮勉此次暫行記功俟得馬
爾邦時交部議敘見今將軍阿桂指日可抵勒烏圍與明亮兵會

合當此賊人喪膽之際富德乘隙前進攻取馬爾邦更易得手○
以四川成都等一百四十府廳州縣行軍運糧免厯年額賦有差
○戊午諭前以各省購訪遺書進到者不下萬餘種並未見有稍
涉違礙字蹟恐收藏之家懼干罪戾隱匿不呈因傳諭各督撫令
其明白宣示如有不應留存之書卽速交出與收藏之人並無干
礙今據李侍堯等查出逆犯屈大均各種書籍黏籤進呈並請將
私自收藏之屈大均族人屈稔漬屈昭泗問擬斬決等語屈大均
悖逆詩文久經毀禁本不應私自收存但朕屢經傳諭凡有字義
觸礙乃前人偏見與近時無涉其中如有詆毀本朝字句必應削
板焚篇杜遏邪說勿使貽惑後世然亦不過毀其書而止並無苛
求朕辦事光明正大斷不肯因訪求遺籍罪及收藏之人所有粵
東查出屈大均悖逆詩文止須銷毀毋庸查辦其收藏之屈稔漬

屈昭泗亦俱不必治罪並著各督撫再行明切曉諭見在各省如有收藏明末國初悖謬之書急宜及早交出槩置不究並不追問其前此存留隱匿之罪今屈稔湏屈昭泗係經官查出之人尙且不治其罪况自行呈獻者乎若經此番誠諭仍不呈繳則是有心藏匿僞妄之書日後別經發覺卽不能復爲輕宥矣朕開誠布公海內人民咸所深喻各宜仰體朕意早知猛省毋自貽悔將此通諭中外知之○諭軍機大臣等昨據李侍堯等奏查出屈大均悖逆詩文一摺已明降諭旨將私藏之屈稔湏等免其治罪止將其書銷毀並另有旨傳諭江浙等省督撫矣閱屈大均文內有雨花臺葬衣冠之事此等悖逆遺穢豈可任其留存著傳諭高晉卽行確訪其處速爲刨毀毋使逆蹟久留將此旨同發出密封由四百里一併發往仍著將辦理緣由迅卽覆奏○諭綽爾甲木燦帶兵

督戰誠心出力甚屬可嘉著加恩賞戴花翎並查明伊弟雍中旺爾結見在所襲係何品級如土司係一品卽將該土舍授爲二品土司係二品卽將該土舍授爲三品總較土司次一等賞給頂帶以示鼓勵並著明亮等曉諭綽爾甲木燦以爾抒誠宣力奏明大皇帝特加恩寵俾其益加感激立功圖報○癸亥定各省綠營兵丁鳥槍照健銳火器二營演連環法式○乙丑冊封惇嬪汪氏爲惇妃○丙寅雲南巡撫李湖覆奏彰寶在普洱染病移駐永昌其時隨帶標弁書役眾多臣以爲皆係差遣辦事之人伊廉俸豐厚實不疑其勒派屬員供應及圖思德到永昌查出保山縣虧缺實數將署知縣王錫收禁始據王錫呈出供應帳目計四萬餘兩臣不能及早覺察請交部治罪得旨該部嚴察議奏摺內又稱前在永昌接見道府各員王錫亦在晉謁之列並無一語提及供應

督臣食用批是何言耶若俟屬員訐告見在上司則天下必無一貪黷之督撫矣殊覺可笑又稱彰寶解任後臨安府知府張鳳孫來省詢及永昌府屬加買軍需穀石據該府稱聞保山縣未經收倉者尙有數萬石卽飭令轉稟署督臣圖思德又批彰寶若不解任並此言亦無矣汝豈耳聾目盲專待屬員之教導汝乎又稱臣與圖思德面商王錫到任未久虧空如果屬實當親盤確數嚴審又批遲矣圖思德不似汝憤憤待汝教導之人○諭軍機大臣等明亮等奏克日旁東西沿河一帶寨落其所到之地與阿桂見攻地方相近漸可會合務卽相機進取迅奏膚功至此次攻得碉卡又係和隆武帶兵前往似此屢次出力實屬可嘉但近日帶兵之事何以總未派及奎林似因奎林槍傷尙未痊愈之故甚爲慮念著傳諭明亮等卽將奎林傷痕曾否平復速行據實覆奏以慰懸

念但奎林素性勇往不可因朕有此問勉強從事必俟瘡口痊好如常方可帶兵行走又據奏有金川頭人阿托帶同男婦來降其小頭目亦畏罪投出則金川人心渙散可知諒有瓦解之勢自係最好機會此等投順之人原可貸死以誘其餘但須擇地安插勿令仍聚原處致生事端又聞索爾甲木供詞稱係金川巴朗索寨人我本寨有二十多人見俱派在黨壩作固頂看守礮卡等語是黨壩一路相距不遠且聞阿桂進剿之圖凱立葉東北卽達爾扎克其下卽作固頂格什戎岡又其下卽穆爾津岡與黨壩甚近今凱立葉經官兵攻克進攻羅卜克鄂博再進取格魯克古格爾提尤與黨壩相距咫尺五福正當乘此勝勢激勵黨壩土司選派土兵進剿五福卽親帶官兵由黨壩一同攻進阿桂並可與之豫約爲合力夾擊之計見當大軍深入復添此一路官兵賊眾難於支

禦成功更可望迅速著阿桂速飭五福協力進剿奮勇自勵以期立功受賞○丁卯諭軍機大臣等昨計及作固頂一路下通黨壩傳諭將軍等飭令五福率兵由黨壩進攻今五福已從黨壩會合阿桂與朕所降諭旨適合實係極好機會就進到之圖而論東北一帶賊碉盡爲官兵攻占焚燒所存惟西南一角得式梯等數處看來亦易攻克指日即可直抵勒烏圍閱所奏各番供單賊番紛紛投出足見境內眾心渙散而逆酋等尙將物件用皮船私運噶拉依雖云瞞著百姓豈能盡掩人耳目更足以啓羣疑而生惶惑是賊眾滅亡之機日見彰著又閱圖內方向黨壩瑪讓普籠兩處與明亮駐兵之所僅隔一河自可卽漸會合則攻剿尤爲得力此時想已合兵矣又據奏黨壩土舍派出土兵搶占戰碉殺死賊眾頗覺出力其陣亡之小頭人土兵及受傷之人著阿桂查明照例

卹賞該土司屢次派兵恭順奮勉並著查明咨部議敘卹賞○彰

寶以收受屬員供應奪職逮問

案國史彰寶傳擬斬監候四十二年故

○戊辰諭據

阿桂等奏大兵攻過格魯古丫口接通黨壩卽日進搗賊巢一摺
稱派兵從羅博克鄂博溝內令海蘭察等直搶格魯古丫口賊人
滾石放槍死力支拒經巴圖魯侍衛薩爾吉岱等首先帶兵向上
奮力迎擊賊人喪膽逃遁我兵勇氣倍加追殺餘賊搶占丫口乘
勢直上將陡烏當噶大戰殲攻克海蘭察額森特等一面直壓至
桑噶斯瑪特一面由陡烏當噶下至山巖將溝內一帶寨落焚燒
是時烏什哈達等於海蘭察等過溝後拏起木柵將達斯札以上
各寨賊圍截於內海祿等將溝內碉寨一槩攻獲遂將作固頂至
穆爾津岡等處沿河各寨悉行勦洗焚燒接通黨壩官兵見已兩
路會合大兵橫越過四道山溝五道山梁直壓至促浸河邊連日

繼夜殺賊數百擒獲活口六名搶獲大戰礮五十餘座寨落三百餘處平朔夷寨烏槍刀矛火藥不計其數等語覽奏深爲欣悅此次官兵等見距賊巢甚近均各奮勇直前踰溝越嶺晝夜鏖戰所至克捷皆山將軍阿桂等審度形勢調度有方甚屬可嘉所有將軍參贊等以及在事打仗出力將弁均著交部從優議敘其奮勇出色各員俟阿桂等查明奏聞另加恩獎見在官兵偏臨促浸河岸卽日進搗勒烏圍賊巢佇盼紅旗捷奏阿桂等摺並發俾眾知之○壬申以四川大功將戴命撥戶部銀五百萬兩經理善後事宜○己卯諭原任大學士蔣廷錫所有輕車都尉世職曾賞令蔣賜榮承襲今蔣賜榮革職之案罪由自取其世職係承伊祖餘蔭自無庸一體革退蔣賜榮著加恩仍襲輕車都尉○諭土爾扈特和碩特等游牧照各部蒙古一體補放盟長○御前侍衛都統五

福卒賞銀五百兩治喪

十二月庚辰諭蔣賜榮著加恩令其在武英殿行走隨同王際華查催書籍○辛巳諭軍機大臣會同刑部議奏五城御史遇有詞訟案件關繫罪名出入非笞杖所能完結者俱送刑部辦理一摺已依議行矣刑部爲刑名總匯審斷易得實情定讞亦較詳慎不但五城案件介在疑似者應歸部結至遞解人犯一事五城提督衙門向俱自行辦理究不免有流弊卽如范宜賓審辦謝大忠一案不能允協已可槩見京師五方雲集眾所環依苟非下賤匪類兇頑生事及實患瘋病之人原可無庸擯歸原籍而遞解之案亦不可無所稽查嗣後五城提督順天府各衙門遇有應行遞解人犯除籍係直隸就近遞回者聽各該衙門照舊辦理外其餘應解回別省人犯均著敘明案由交送刑部覈明應解與否妥協辦理

交該地方官嚴行管束並著刑部三月彙奏一次以昭慎重各該衙門不得仍前自行遞解著爲令○壬午諭原任刑部尙書王士正之名原因恭避廟諱而改但所改正字與原名字音太不相近恐流傳日久後世幾不能復知爲何人所有王士正之名著改爲王士禎凡各館書籍記載俱一體照改○甲申命纂勦捕臨清逆賊紀略○乙酉吏部右侍郎吳紹詩以老乞休允之○戊子諭和郡王縣倫薨逝伊雖無子嗣見有親弟二人按兄終弟及之例應得襲爵著宗人府於縣循縣倬除服後帶領引見候朕簡定至向來王等襲爵惟軍功勳舊諸王例應世襲罔替此外如怡賢親王之公忠體國經皇考特恩有世襲罔替之旨亦應遵守勿替其餘恩封諸王襲爵時例應以次遞降蓋承恩封爵宜有親疏之別若不限以等差則國家延祚奕世王爵愈積愈多既不免於冗

監且與勳勞世及者無所區分亦非所以昭獎勸此展親之恩不
得不示之節制也卽如和勤親王永璧襲爵時已應降襲郡王朕
念其爲和恭親王嫡長子朕之親姪不忍降封是以仍襲親王迨
至縣倫則不得不遞減爲郡王矣今繼縣倫襲爵者於例應降封
貝勒但朕究念其爲和恭親王之孫且縣倫襲爵未久卽嬰疾早
逝弗克長享藩封殊爲可憫今若照例改爲貝勒則是和恭親王
薨後未五年而王爵已失於心實有所不忍此次仍著加恩襲封
郡王將來再遇應襲時卽照例遞行降襲又念諸王遞降之例自
貝勒貝子公以下至奉恩將軍不過六七傳卽至奉恩將軍世襲
罔替朕心仍有所不忍嗣後著加恩凡親王以次遞降者至鎮國
公而止郡王以次遞降者至輔國公而止其公爵均著世襲罔替
俾我大清國億萬斯年親王郡王之子子孫孫均得永延世澤恪

守恩封以稱朕篤厚宗親至意著爲令○庚寅諭軍機大臣等明亮等奏焚燒沙壩山坡寨落情形甚好昨據阿桂奏見在攻打甲爾納賊碉一經攻得即可進剿得式梯及噶爾丹喇嘛寺似已操必勝之勢今明亮等奏與得式梯相去不遠是兩軍指日會合成功尤當迅速佇盼捷音至明亮等奏投降霍爾甲等四人尙屬誠心效力明亮等當酌量賞賚以示獎勵所稱各土司土舍等多僭用頂帶指曰大功告竣應再酌定之處尙未妥協土司等頂帶久經相沿僭用若於功成之後再將已用之頂帶改降恐不足令其感悅莫若俟大功告成後傳朕旨曉諭隨征各土司以爾等所襲職銜若照定例宣慰司係三品止應用亮藍頂安撫司係四品止應用暗藍頂而歷來土司等多有越品僭用光紅亮藍者本應照所有品級改各項頂帶今大皇帝念爾等誠心出力甚屬可嘉見

在大功告成卽著照爾等見用頂帶賞給作爲加銜榮耀以示優獎土司等自當益知踊躍感戴○辛卯定各省裁缺佐雜人員留本省補用例○壬辰諭各省鹽政關差織造除地方公事不許干與外遇事有關係者隨時入奏○癸巳調袁守侗爲吏部右侍郎由刑左調○甲午諭昨曾降旨將恩封之親王郡王襲次遞減至鎮國輔國公者卽令世襲罔替以昭展親恩誼至於貝勒貝子公承襲之例若何未經議及又原辦之宗室王公功績表傳其由恩封而得者雖不比軍功之各立專傳亦應列入表內著軍機大臣會同宗人府一併詳悉查明妥議具奏尋議嗣後宗室王公等由恩封而得者均請列入表內編定進呈其貝勒以次遞降至鎮國公應降襲鎮國將軍貝子遞降至輔國公應降襲輔國將軍卽令世襲罔替從之○乙未以四川各土司夷民急公效力免歷年馬貢夷

賦有差○丁酉予故和郡王縣倫祭葬諡曰謹○戊戌轉胡季堂

爲刑部左侍郎以王杰爲刑部右侍郎董誥爲內閣學士

由翰林院侍講

遷學士

○丙午諭土爾扈特汗渥巴錫自投誠以來深感朕恩一切

甚爲恭順於遊牧事務亦能盡心辦理今聞溘逝殊堪憫惻著派
乾清門侍衛鄂蘭馳驛前往伊游牧處奠祭仍撥哈喇沙爾庫銀
一千兩辦理喪事並將渥巴錫之爵令伊長子策凌那木扎勒承
襲○丁未命高晉濬淮安河道溝渠○是歲朝鮮琉球來貢○會
計天下民穀數各省通共大小男婦二萬二千一百二萬七千二
百二十四名口各省通共存倉米穀八十六萬五百一十石六斗
七升九合零